



快雪堂日記卷之四十七

秀水馮夢禎開之著

余自丁亥遊天目以後日所歷夜必記之  
甚龐雜不次今芟其什三爲日記每一披  
覽陳迹如新省心寡過亦一助也真實居

士某識

丁亥

四月二十六省同年盧思仁舟中盧以祠部郎  
言事傷切皇上起居庭杖削籍過此始聞

快雪堂集 卷之四十一  
余被逐狀拜同年北關主政浦良弼太公方留  
小坐而繆樂陳三兄自山中冒雨歸衣履無不  
沾濕因邀同坐王季孺以書約明日魚服見訪  
今日得陸敬承朱汝虞故友管登之嘉興舊令  
陳汝麟書  
二十七陳季孺來留坐子晉季象陪廉憲吳公  
來期余雲居會蓮池師白下僧雪浪卽三懷孫  
文融虞長孺而余以季孺故不能出  
五月初一茂吳酌坐客孫文融余世輔俞孟武

至堤上坐復往孤山因都闌設席不登岸晤張  
山人卽住靈峰而爲僧所逐者今住陸祠茂吳  
作十絕句慰之茂吳出採蓴曲八章索余輩和  
陳季象至館

初四雨畜器貯梅水始用梅水點試天目茶季  
象茶癖於此一暢夏至後逢壬立梅今日壬辰  
日也閱宗鏡錄一至三卷

初五雨杭俗端陽頗盛奎奴刷鮓魚去鱗亦鼓  
掌一助也盛叔永來預蒲酒之會薄莫而別閱

宗鏡四至六卷熱

初七雨午後晴故鄉新籍諸生縣不下八九十人而戴生不與亦奇矣閱宗鏡七卷

十一赴靈隱之約沈太公先行同陳季象樂子晉兩兒從遇徐茂吳俞孟武及廣陵侯君薄莫而返湖色澄淨荇藻可數

十六遣視金玄朗已行得其所留尺一云以瘍甚返吳復遣書通黃旨玄中翰渠約晚至日中出無情作佛難陳季象樂子晉虞長孺俱有答

閱宗鏡十一至十三卷

十九雨閱宗鏡二十卷二十一卷二十二卷二十三卷作王元美先生尺一欲托余世輔寄去而不及當待他信下午雨止夜復雨

二十七史裕菴見訪食大雄山楊梅紫而且大在諸山之上

六月初一雨閱宗鏡四十六卷虞僧孺來真霞外人長孺乃有此弟

初六雨閱宗鏡五十九卷六十卷俗傳此日爲

快雪堂集 卷之四十一  
三  
猫狗洗浴日不宜雨雨主大水

初七雨自黃昏逮曉不絕聲早益甚如注以壬  
課占何時晴今日乙丑時加於辰勝光爲朱雀  
加日過午時卽晴丙寅丁卯繼之朱雀得氣從  
此雨止矣午後果晴閱宗鏡六十一至六十三  
卷沈太公自西溪回

十九閱宗鏡九十九一百卷自五月初四至今  
共四十五日而終但粗閱一過尚期歲內再閱  
至三至四以盡其妙不令空手入寶山也遣書  
存公亮約三日後來夜坐星下奇雲如綺倏忽  
萬狀自六月來此二日爲最熱手探器物如火  
汗流浹席五更同婦起坐庭中月正中微雲掩  
暎醲淡有無最爲佳觀

二十一廬山僧心悟以曾于健藏師兄書求見  
爲其師徹空禪師乞塔銘行狀慙山筆也留悟  
上人齋送住昭慶文上人房悟云 聖母遣僧  
某送法藏至天台秋初當至

二十五李玄白來留飯曹林師兄來談對竟日

出宿昭慶

二十六潘景升來遣數字存公亮日中跨蹇至昭慶視曹林師一如上人松毛場登舟至西溪裸行山中至安樂山南而返宿瑞庭菴

二十七五更甚涼次卿來同閱倉基及行西溪市至徐氏樓樓已敝但面南諸峰如黛前列因有卜居之意飯後次卿別去遂成徹空禪師塔銘是日大熱

二十八早成崇福菴永爲十方常住記裹巾謝

萬純齋錢養微二公岳翁以土木二匠來度地季象同來飯後策蹇而出小憩佛慧方丈報先印泉精舍至昭慶同曹林一如納涼戒壇後季象亦至俄而風雨大作遷避壇東大雷驟涼雨止行到家已莫矣子晉自拙園歸得項墨林尺一并東觀餘論一部

二十九赴曹林一如二師約至湖中憇淨慈大殿石林沙彌迎至其寮設齋爲歛有微雨薄莫自湧金入城曹林一音義甚快夜復有小雨

七月初六至靈芝寺拜雪浪上人遇雨晤楊柳亭徐茂吳留齋

十一潘景升來遣書候沈純甫先生午後至靈芝寺聽雪浪上人說惟識三十論晤許景修楊柳亭晚歸晤來道之

十二同雪浪上人楊柳亭虞長孺陳季象樂子晉赴崇福之約上人說三支比量暮而返

十五赴潘景升湖上約同雪浪月音兩上人徐茂吳陳季象劉姬茂吳留宿湖上而余失賫臥

具獨歸是夜月色甚勝

十六景升來余羨昨夕月色景升遂有夜約午後有雷雨夜同子晉季象持卧具出而月色似爲雲物所妒主人意不怡余謂當小待之自佳耳登舟良久而雲消月現湖風揚波不能遠泛至斷橋而止劉生度曲季象吹簫四山漸明水燈一片如繁星墮地遊舫爲風雨所阻無一開者此夕風景全屬我輩故自不易已登斷橋語笑良久主人及劉生別去登舟就寢已四鼓矣

十八監兌石君來頗留念宗乘佳士也得沈純甫報書楊公亮來

十九鶴林慈航一如三上人自攜李來留飯云迎送藏二僧遇於吳江頃卽至矣無何二僧遣人相通卽從肩輿至北關看之且禮大藏裝潢甚麗紙則遜舊印多矣補藏四十四函附至內缺泰字而補秦字烏焉成馬可嘆得達觀師書以莽會首別傳二老塔銘見屬明日約齋二上人一名永慶住明因寺號仰岩一名廣楨住龍

華寺號瑞菴

二十一早赴石司農約同虞長孺席設紫陽菴竟日大風雨飛瓦拔木桐花館庭中六桐僅存其二肩輿逆風甚澁幾不成步省陳伯符風雨徹曙

二十四得新安汪司馬仲淹雲間袁非之書俞公臨遣送少選公臨來約莫至至留宿

二十五同子晉季象閱公臨詩草酌余君房陳伯符楊公亮



二十七雨閱邸報山東巡撫李戴奏袁州府六月初九辰時天光雲合一星如斗形帶火光自東南落至西北聲如雷得楞嚴所寄成惟識論二十九得項民逸書林玄江來報任丘令侑以筆二十枝既午大雨如注平地水尺夜繆仲淳至得王宇泰書雨點滴徹曙不休

三十雨酌林玄江林閩之福清人名尚昺賈于京師向從君典太史遊君典請告以屬余其人頗有義氣往來無間今蕭然貧矣族人資之以金令取其息以索負至此閱邸報七月七日刑部員外李懋檜論言官疏甚佳僅得降級幸矣八月初三卧中聞雨滴得莫廷韓六月書筆工某齋至廷韓以七月初旬棄人間矣袁坤儀先生來呂水山來

初六陰雨而時見日酌朱武原先生同繆仲淳樂子晉陳季象戴升之沈太公武原乃郎及驥子鷓雛俱在坐得鍾西星書昨閱報戶部右侍郎孫丕揚言陝西饑荒人有食石者進食石二

升殊無優旨傷哉給事中梅國樓等各上疏擊  
李比部比部再落二級得開州判而吾門胡生  
與焉甚可恨也吾鄉劉比部志選亦以建言落  
三級得代州判周元孚貶所也一時二比部鳳  
不孤鳴矣

初九午大風雨潘景升贈弘明二集顏氏家訓  
延郭產醫視沈氏女淨圓往覓橋晚晴月甚佳  
十四約盛叔永姚善長葉鹿吳期泛月湖中沈  
伯宏陳樂二君薄莫而出既登舟初有雲氣在

西北隅如欲作雨而不妨見月過陸祠雨墮水  
中如撒珠擊玉而當月處雲不盡一暈光益皎  
潔此生平所未見也雨止抵三橋散步隄上酒  
從之季象忽病腹痛不能從同諸君列坐橋上  
月益奇纖雲盡滅良久登舟就寢謂舟人當泊  
三橋內比醒忽聞囂聲已至錢唐門矣急呼廻  
舟至斷橋時月正蝕光不盡如鈎坐橋上食頃  
而曙與商野女藥賣於市刺樂再宿賦土民  
十五梳洗畢葉君先別去餘粥而別入城晤徐

茂吳于金公宅約薄莫出至家則仲淳已在齋  
頭矣與商理方藥竟約仲淳陳樂再宿湖上舟  
停斷橋相待而赴茂吳之期薄莫自湧金登舟  
茂吳方與金華胡元瑞對奕余至舟開至淨慈  
小坐月上良久而喻侯至放舟至第一橋初藉  
氈地坐良久就几案月且中登舟至湧金而別  
就小舟至斷橋覓舟不得乃返昭慶扣僧舍則  
卧具已取去復至斷橋得舟呵責栖奴則諸君  
云待余良久乃泛湖相索不得而返亦何誤耶

同仲淳子晉登斷橋語話五更就寢

十六別仲淳伯宏同子晉季象至西溪則瑞亭  
上人以訪余入城乃止大庵索枕卧良久而瑞  
亭上人至盛叔永亦至視余所卜西溪基地以  
爲佳別余入山時已迫莫見似虎者驚而返季  
象至直塢莫而返余三人宿瑞亭舍中盛宿永  
興寺林中見月甚佳

二十二真相治具爲壽而以急赴家觴領其意  
而別禺中至家家人上壽畢諸親識至以蔬麵

勞之自周申甫而下幾二十人是日晴得同年  
陳心抑侍御書夜大雨達旦

二十八與仲淳約夜宿佛慧飯後吳桂軒爲沈  
太公來遇之桐花館中下午索輿省項庭堅昭  
慶至松毛場則仲淳子晉見待久矣微雨灑途  
亦不爲害薄莫至佛慧晤曹林師兄甚喜秋月  
者杭僧以粗行聞而林兄能化之使帖然服役  
欲同禮達觀師人故不可測也徹夜雨

二十九雨日中後漸晴同子晉西行探泉源而  
返至白業堂晚桂甚香坐庭中良久吳僕進茶  
而出夜見星

九月初四雨午後少微明因龍華二送藏僧自  
天台還已至昭慶因從曹林仲淳子晉出看之  
且爲天竺期遂與曹林別善友難遭甚懷離索  
之感同子晉入城

初五雨徹曙萬和甫書來期瑞菴仰崖二上人  
明日就齋天竺同遊中竺下竺靈隱飛來峰岳  
墳而歸至八字橋仲淳別去宿寶奎寺中秋後

物雪堂集 卷之四十一  
今夕始見月

初九潘寅所來亦今日令客也下午赴令君席  
席設鐵冶嶺吳氏莊公亮以稱疾不赴  
十六拜陳豫吾送禮收得士錄二部扇四把肉  
人送公亮夫人禮六色赴通玄道士約陪聶先  
生屠長卿遇公亮雲間彭郁二君受聶先生一  
氣丹印完佛書報石楚陽微雨  
十七移榼通玄觀請聶先生長卿彭郁二兄受  
太乙煉形訣雨

二十六雨早達武林長卿尚未往宣城晤衡岳  
遇仙者金翁於沈太公齋中夜繆仲淳同所親  
秦君至

二十八至通玄觀省長卿唐君再爲吾點照與  
長卿共幅欲寄三耳師者晤姚華陸盛言郁雲  
和先生不死有驗或然或否晚歸至門聞拙園  
雪奴死甚快雪奴鶴也究其故則模奴誤聞吾  
夫婦之欲移畜此鶴於武林途中困厄而敝死  
得狀笞模二十

十月初四送屠長卿遇之途中唐岐山爲余及長卿寫照共幅者是日成長卿爲余作像贊余且報之而未成也陰雨下午漸密遂徹夜更餘見天南北俱有光如火焰在南者倏起倏滅不知何祥也

初八早得余郡公周元孚書刻工朱生自吳江來歸藏本中峰廣錄成惟識論送新刻中峰廣錄二部得藏師兄丙戌八月書及仇先生周季華書索華嚴藏本在拙園以華嚴論前六卷付

之孫竹墟來留叙約十一日登五雲底莫仲淳歸自西溪云新得市南地僅可爲莊居十一赴崇福庵齋爲易住持也是日雨十一月初三謁張洪陽先生於浙江驛晤虞德園楊抑亭後至留飯同至六和塔晤蓮池師洪陽先生約之出也

二十四行弔周氏晤叔宗季華兄弟買舟至吳門詢臺翁舟已發及之滸墅登舟相見甚驩更餘返宿樂子晉家是夜感傷風疾

十二月月初四米子華來梅谷師來計贖菴也約  
待仲淳歸定議暫住智果山居過冬留與子華  
共齋答汪座主書有勞山便信附藏師兄書并  
發鄉同年顧悅菴書時爲祠郎勞山印經求其  
催督耳

初九蘇紫溪學憲來面薦李君實戴升之兩生  
十四赴蘇紫溪席恒叔已先至自湧金登舟至  
淨慈小坐居然亭徘徊蓮花洞良久聽恒叔談  
華頂桃源之勝大殿登席聞公亮且至出其書  
於二兄晡時登舟而返陰夜雪甚盛

十七方遣存問陳肅翁老師書附楊公亮入閩  
而陳公衡使至得書且得肅翁前後二書萬里  
神合良非虛語

三十晴錄曾氏類說目錄完初昏率妻及二子  
享高祖已下行禮於像前燒松棚家宴今年歲  
事賴婦能料理貧而不困西北風

快雪堂日記卷之四十七

快雪堂日記卷之四十七

快雪堂日記卷之四十八

秀水馮夢禎開之著

戊子

正月元旦晴明東南風甚微禮佛及諸聖次禮  
 高祖已下各四拜次與婦再拜次受二子及男  
 婦拜次同婦二子至外家拜節周申甫來  
 初十日雨午後止撰先室石孺人墓誌銘  
 十四日雨刻工朱生者納中峰廣錄三部大慧  
 年譜宗門武庫各四冊舊冬托印者朱乞包心



章書求刻楞伽得繆仲淳舟中書薄暮雨止然  
陰翳不開稍見飛雪

十五日晨起婢報飛雪屋瓦盡白俄漸止漸開  
禺中遂晴前徐茂吳云初八夜不見參星疑之  
而家婢夜起者見參星炯然遂符中秋有月之  
驗天道信可知哉初昏尚有雲氣俄頃皎潔燈  
月輝映大奇大奇酌朱魏二先生二先生率三  
生天街看燈予同細君中庭看放烟火是李揮  
使母夫人所遺者

十六日早陰將午而雪屋瓦倏忽積寸許昨沈  
太公約移榼省鄭梅屋遂冒雪步往初更歸鄭  
向往來故不得以失意相遺也鄭樓有九邊圖  
屏風頗詳細冀異日借臨之戴生至館  
十七日雪消且雨周元孚至蔡守道亦至元孚  
避他室送蔡然後送元孚約晚至侯娘携其同  
人李姬至薄暮元孚來二更而去元孚以十月  
喪其董夫人夫人能詩而賢善撫前室五子元  
孚悼之甚梓其存稿數十篇索余爲小傳今夕

落燈而元孚至亦佳事也

十八日收高祖已下真遣迎元孚云有他事不

至下午潘去華入城約明日來陸少白來時謫

布政司照磨天陰

二十日周元孚期游三茅觀晤元孚二子應東

應崙應崙甫十六其舉子業甚奇微雨晚陰爲

元孚作董夫人小傳

二十二日元孚先至坐久之去華至飯而後行

去華別矣贐以林間宗門武庫拾遺各一冊作

高祖已下像贊十二首首各有序爲董春亭作

書遺鄭梅屋董負鄭五百金而貧鄭索負甚急

道地稍寬之耳鄭荅書欲余爲之處余薛蘿情

寧能染此等事哉

二十三日方粥聞荃兒訃爲文哭之遣蘇奎妻

迎大姐午後至北關送周元孚贐之中峰廣錄

一部夜宿元孚舟中晤楚人梅生克生之從子

及金華方生玄暢見元孚幼子雨

二十五日卧内問婢云雪下未止睡醒忽見晴

快雪堂集 卷之四十八  
色起甚寒登樓瓦雪積數寸一望皎然甚佳披  
紅毳衣裹複巾看沈太公并示之哭荃兒文適  
余郡公至易冠帶迎之復至太公所飲藥酒半  
甌薰然微酡昨日爲曾祖母居氏忌在周元孚  
舟中尚記歸忘之乃以今日補祭作雪衣冢銘  
初夜星斗燦然與積雪相映爲之躍然甚寒  
二十六日晨起積雪無恙但天復昏翳久之漸  
開至書舍省朱先生戴升之停午始聞融雪聲  
爲季生草淨土三經緣始作自贊漸晴

二十七日侵曉登樓見積雪如故拜傅按君因  
此得看胡氏園梅花小坐梅閣而返歸作孺人  
像贊二首停午見簷滴作聲久之漸密漸盛音  
韻訇然久之漸疎薄暮而止

二十九日認鄉粥而行阻雪不果龍井期午後  
日出尋少昏翳然雪消欲盡矣夜崇德呂氏親  
家母郭夫人訃至以此日卯時卽世壽八十此  
月喪沈氏外孫此日又喪呂氏親媪未免率鵠  
兒申一哭于呂氏而吾女迎之不至又未免至

海上看之人生煩勞強半爲子女可歎

二月初一日作五日頭陀頌慈祖東溪公生辰  
設祭夜雨跋曹林師五日頭陀記并頌

初二日雨楊公亮書來還所貸三金作沈孺人  
曾祖父母二贊及跋晁無咎猪齒白佛贊

初三日自長安如崇德與周申甫同舟晚雨

初五日早至東新關飯嚴氏叔姪步自蔡市橋  
別申甫還家得李仁卿報書雨午後益甚終夜  
聽滴瀝聲晤陳生談玄

初七日夜雨不止早起忽有晴意但未卜究竟  
耳禺中時遂見日色如見千里故人快不可言  
尤生至云僧曇廓至京師遣藏師兄書舒古堂  
來得張梅村書留舒老宿舒七十四歲而無子  
市書畜古玩逐利不休欲與余刊二十一史板  
以宋書北魏爲始老人可畏哉星月甚佳

初十日風鄒三府來諱雲鵬吳江人以南比部  
郎謫柴野松來邀予至上方寺省蓮池師途中  
省吳桂軒遂與同行晤虞長孺隨喜放生

十一日早謁龔毅所晤遂安御史俞乾貞盛爲  
予談彼土山川之幽勝答拜鄔汝翊譚玄似有  
見者李伯遠來留敘庭中月色大佳二月所未  
見今日甲子晴一春有望矣

十三日從岳父張姨夫入山待之錢唐門良久  
始至泛湖至毛家埠步行一路梅花甚佳飯于  
周氏舍歸途至何氏梅園梅尤奇至毛家埠登  
舟自岳墳西泠橋至汪氏莊小坐汎湖至錢唐  
門上輿拜劉別駕呂舅而歸月赤無光

十四日同婦二子上外太婆倪氏墳汎湖至日  
晡而歸其日風小但日色蒼黃四山黯淡耳

十六日昧爽出門至五雲祭掃而歸就龔毅老  
于天真書院則毅老先至踰時矣拉金伯韶至  
亭上談敘良久而別初山色微昏後漸合早日  
又赤疑爲雨微飯而行遂遇雨假蓋寺僧雨亦  
漸微抵家約丁長孺夜坐業已湖上期許明晨  
至月甚佳

十七日晴卧内聞項民逸孫上池羅三田捉衣

從之拜劉純一并拜小鄔君拉純一渡湖至淨  
慈瑞溪先生尚未歸良久方至談敘甚洽頗有  
意純一養生之學中庭梅花助以夜月意色佳  
甚令人忘卧宿觀音閣受純一所得張洪陽一  
法云有奇效容卽試之

十八日先送純一次索舟自湧金門而歸朱濟  
川來朱以醫居桐鄉與余有蓮社之舊留之宿  
云將拜觀音大士于天竺約明日至

二十二日陰雨沈太公酌袁太冲先生金鳳泉  
同敘邀余作陪外父得白瑞香一本不盈尺芳  
香可愛以遺細君出供客玩袁先生爲賦七言  
二律袁詩別是一種非唐非宋亦非王李常不  
可解此詩二結語甚佳

二十三日得傅伯俊書傅爲山西巡按去春大  
計時爲余特謁相公白無它而不能奪也卽作  
報付使者寄中峰廣錄一部餘姚孫生來謁正  
峰先生子名如止字世芳於侯居爲從弟少年  
有志叅學亦俊流也李仁卿家眷至存之以八

楹且請湖上期仁卿云必俟晴不妨過上巳夜  
雨雹

二十四日雨午後有霰雹連日春寒不減殘臘  
今日復易綿袴米子華書來并一詩頗以旅食  
爲苦

二十六日鄔汝翼借宗鏡付其半共八帙陳伯  
符金伯韶相繼至共敘至薄暮去西安楊生方  
生引徐生士新來拜徐字徹銘夜雨急雷電雷  
如鼓聲豈天鼓耶

二十七日無雨而陰赴鍾繼沙湖上之約同伯  
符伯韶看湖上柳色甚佳

二十八日袁太冲先生來踐一宿之約雨

三十日至陡門而曙有霜甚寒諺云春霜不隔  
三日雨甚爲危之底祖瑩而飯尋至拙園梅花  
方盛而落花亦擁砌香氣撲鼻但籬僻荒頽甚  
爲主人興感拙園額沈君典太史所書今遂隔  
世傷哉坐淨業堂徘徊良久過存姚節婦遂歸  
弟舍宿焉夜題旬日聽雨草許徹菴先生秦中

訂士錄門人稿共三首

三月初一日晨起陰遂細雨春霜驗如此至長水塘展慈祖東溪公墓次展西門祖墓次展常住橋墓下午雨止約仇益泰先生晚晤至家則已至久矣李君實送文稿來選其十五作付刻仇益泰云二月夜雨可以占水旱十夜雨爲均平少則旱過十二則水嘉靖四十年十五夜其年秋冬大水高鄉俱沒去年丁亥十八夜水甚辛酉今年則十七夜矣恐水患未弭奈何

初二日霧晴赴項玄池約姚羅浮在舟同至烟雨樓登眺良久而主人方至已葉鹿吳來同敘遂至真如長水法堂堂成今日第一登也石梅移植堂後曰石梅軒晤謚公索觀龔郡公堂記甚佳將暮看槐龍乃登舟而別余不至真如已二年矣

初四日陰有微雨省項民逸姚羅浮孫區吳到楞嚴至東靜室晤了然師見 聖母所賜觀音及金襴袈裟先赴包瑞溪父子於席上晤趙少



虹晚乃赴吳小泉翁道說生平多遇異人知內  
外丹者林端號虛泉四川浮丘人其師萬祖名  
安國宋時人蓋化形而降箕者林今爲蜀府紀  
善與小泉公別廿八年矣萬嘗語小泉公汝欲  
問此事三十年後林生當向汝說又王良山京  
師遵化人遊于陸錦衣之門與小泉公相善嘗  
同榻其身矮小常坐不卧處牀弦綽有餘地小  
泉公欲歸王因留之不可問何時返曰當在三  
月王曰如此吾不得相見矣何無緣耶至二月

錦衣爲薦聞

世廟明日將見

上遂易新衣

端坐而化其日錦衣使者一見之居庸關一見  
之承天府俱托致聲錦衣王真身今尚在京師  
陸氏莊居莊居後歸朱氏龕入鄰寺又張世傑  
真定人項下生癭甚大壓胸遇一人授以彼家  
術癭漸消又授以外丹小泉公因買朱砂遇之  
張問之吳姓大喜曰吾得異術師教遇口姓人  
當同事今其時矣遂從小泉公歸而試之俱有  
驗張面黑每坐久則紅飲食至多或不食小泉

公嘗見其所授之師行如飛急行不能及譚之甚有曲折尚當再叩而詳書之是夜宿吳氏家與仇先生連榻夜有月

初五日晴晤顧貞陽遂同舟訪沈純甫顧貞陽指示真土秘訣卽巳卯春得之張鈞石先生者但行火法度微不同耳包心韋同弟孝廉心弦以舉業各一帙就正

初六日晤李君實書舍乃登舟與仇先生同往海上下午至先至天寧水竹居索楚石禪衣瞻

禮主僧陸晚巖能詩云此出西竺爲兜羅綿西人云其價視洒哈刺數倍乃禮楚石塔復至他僧舍索鉢鉢徑尺正圓如倭漆有四巴上如鱗者二層四周泥金爲天花飾之內木文理甚細余每至海上則索衣鉢觀焉今三度矣乃入城見沈親家長公及壻女慰存巳謁仇謙謙先生十一日拜袁太冲先生知微之巳歸旬日矣拜黃默菴至雲居荅拜汪生兄弟存三衢七子鄭生病存之榻前旬日聽雨草刻完晴見月喜甚

十七五更見月發舟將至趙村而曙是日遂晴  
飯于彌陀寺主僧石泉出迎驩甚假山輿于徐  
氏墳菴過嶺卽城山也行五里而達三國時嚴  
白虎者據此山爲亂郡守亦從之壘石爲城遺  
跡尚在故曰石城山後爲孫策所平同遊者周  
季華沈認卿熊存吾初不意此日晴亦天假也  
歸舟宿南門與周沈約早晤峴山寺

十九早行雨漸止而陰午後復雨由瓶窑泝大  
溪將至餘杭五六里而夜雨不克進遂宿于舟  
中睡醒舟隙忽見月

二十早至餘杭大晴始望不至此下午至高莊  
山家小憩良久且登竹林橋眺望溪山而歸周  
申甫始至留青山看地熊存吾家人木一自豫  
章至得龔大叅書寄到所撰清白池記今日驟  
熱夜易夾袴夾襪體中如釋重負初昏微有霧  
氣更餘氣益清

二十七晴早起遂行主人方覺已登舟矣同熊  
先生申甫兄弟舟中僕有笋供而以斤肉噉熊

先生午至松毛場盤桓周氏墓自錢唐門至家途中買得禮經會元都元敬詩話王常宗集卽率兩兒至書舍夜米子華來

二十八拜陸少白少白述其所以爲臨安狀大都勇于革弊而不甚精于察奸耳

三十王方伯來索西曆并立成等書余報以樂生至卽檢奉方伯有志於此非俗物矣下午高心田來云陸少白署印不終撫臺已下檄殷乙府矣如此亦陸君之福也

四月初一禮祠堂陳生良卿來盧思仁年丈來留敘至夜別去李君實附書并文十二首至陰夜雨徹明

初二日盧思仁送冊子乞詩嚴蓋夫來以徐生必達見椎朴中無所不有今日得此一士下午晴但寒甚如冬恐非晴兆

初四三衢徐生士新方生文烈介余生大中以見薄莫大雨如注達旦

初五日雨將午小歇晡復雨鄭敬塘惟增同諸

生田義來諸以堪輿自負極論過峽之理謂辨  
峽則穴情及左右朝對有無多寡可以坐斷理  
或有之雨徹夜

初六雨萬和甫書來見存附致其弟國隆書乞  
江西學道沈箕仲書爲科舉地也鄔汝翊投予  
見懷詩二章并雜詩二紙晤魏若水魏真州人  
以醫寓此精于眼科能除障翳魏云餘杭黃塢  
進三十里有禪仲塢甚勝馴鹿日繞村民家乞  
食俗名錢程湖一名浮里東徑山西羅窰再入

有大塢曰白鹿塢甚寬而無民居自平窰至黃  
塢旱路二十餘里禪仲塢有一道人賣紙曰黃  
祥失明魏起之德魏甚尸祝之其家此人可爲  
鄉導魏嘆述其中山川甚妙孰謂世間無桃源  
乎薄暮雨益甚復有徹夜氣色傷哉雨遂徹夜  
初九日霧起稍晏見雲翳未淨日色慘白疑之  
俄而大晴梅谷師來欲邀余至武康定一道塢  
爲棲隱計薄暮雲遂翳空夜微雨有無之間買  
宋史新編通鑑續編朱晦菴全集宋名臣琬琰

集醫說東坡地理指掌救荒本草梅宛陵詩集  
二程集全唐詩話王十朋註東坡律詩陳簡齋  
詩金陵古今圖劉靜修集程雪樓集李古廉集  
愚莊集林公輔集蘇平仲集程梅屋集鄭麟溪  
家集祝枝山集共二十二集卧聞雨

十七陸三田來陸名孝德習知玄學陸少白來  
此日天氣將開時見雲日豈其晴乎先是丙寅  
日發壬課時加于申午加于日今日庚午而變  
宜也夜見月

十九曉起行晴午後至楊墳同仲淳至通玄觀  
自楊墳尋支徑登折三里而始達觀寂幽僻舊  
爲羽流所棲今爲禪院矣梅谷上人欲寓此過  
夏故有此行主僧欲留宿而貪途不之許遂行  
夜宿德清大風

二十三早細雨近午始晴得李伯遠書尤器之  
來知達觀師及藏兄曹林輩俱以三月至真定  
達觀師竟未發峨眉或由此而進未可知也  
二十六晴早入關至松毛塲登陸行里許乘肩

輿入城得屠長卿書遣人候聶仙索所題三真圖使者行已一日竟不及寄盛叔永來留款至夜叔永甚有志神仙意殊拍拍

二十七細君同諸女遊湖沈生守約來陳季象來知虞僧孺病狀徐生可求日乾來

二十九五更起黎明出門拜仁和令丙戌進士楚之淇水人楊公亮之門人也相見甚驩舊令江西之餘干屬顧務遠務遠托寄聲于余遂至湖上覓田先生于昭慶步至舟中良久李仁卿

始至遂沿湖至岳墳從肩輿至靈隱徘徊飛來峰下諸巖洞列坐冷泉亭至呼猿洞而還子秬云樂心羅者奇士江西人爲洪張內相之門客能言秘事言馬市馬一匹直銀十八兩賦之軍士失馬則償價馬死則輸銀六兩將官先勒月糧六兩然後賦之馬虜以馬困中國而將官復以困士卒邊事之可笑大率類此傷哉去歲正月余同妻大父樟翁至田先生家方告歸而樂君至失此一晤樂有親在吳中或再至必欲一

悟以悉異聞耳又至周莊坐良久李仁卿別去  
田先生還昭慶而余入城

五月初一祭祠堂周對峰來名一冲鄞人唐岐  
山弟子能傳真袁太冲先生所薦微陰

初二昧爽出門松毛場登輕舟爲茗上之行大  
霧再醒再合午後始收宿路村去茗城二十里  
初四周母以午初葬送葬畢還彌陀寺夜與仲  
淳叔宗認卿談敘至夜半不倦

初六微雨時飛過五臨港一舟追至則叔宗也  
同飯舟中余先入城三衢生楊樂方文烈徐日  
乾來徐生以迎父奉常公且至吳門有數日之  
別故來而會余還家亦偶然耳送三生而叔宗  
至叔宗欲晤米子華移書招之薄暮至初更細  
雨徹明

初九昨與周申甫約入天竺看鑄鐘待之共晨  
餐而發久不至遣人偵之則云已見待于湧金  
門矣旣飯從之問湧金船丁知已先渡遂索船  
至金沙灘步行靈隱小憩飛來諸洞至天竺長



生房同子晉申甫至白雲堂且徘徊鼓扇之所  
宿山中

初十同申甫登覽神尼舍利塔而子晉不行至  
飛來峰下始及之遂至韜光旣飯晏坐良久返  
至飛來峰留連諸洞渡湖至申甫莊居而別予  
至昭慶省嚴徐兩生兩生送入城予覓肩輿而  
別夜月甚佳

十二拜滕撫臺晤楊進士周生爲余點真然不  
如唐生遠矣下午落微雨

十四滕撫臺來吳桂軒田子藝來二公談坐甚  
久方文烈徐可求嚴徐二生鍾繼沙乃郎俱以  
文來見坐亦久驥子戲作詩語頗狂朱先生函  
示張近山先生自吳中來今年八十矣自陳所  
悟疊疊不倦

十七早拜徐少卿諱一櫝徐生日乾之父晤袁  
微之赴李大夫湖中席同吳田二先生至玉泉  
坐泉亭翫魚投之以食羣聚爭噉爲金爲玉爲  
青黑雜色大者十餘斤約數百尾其池宋人造

紙于此返舟至大佛頭而別已暮矣得叔宗姚  
弁山臧晉叔報書

十八從張近山樂子晉來道之張于燕姜子幹  
田子藝先生袁微之南陽甯養愚周申甫遊湖  
自湖心亭至淨慈登居然亭慧日峰復南峰地  
自西泠橋出斷橋而別今日劇談田先生爲上  
首酒興來道之上首

十九徐賓湖來徐將假館湖上與乃郎日乾共  
處一二月約既定移榼看之虞僧孺來僧孺向  
畱心玄學而情習未除遂發心疾味其談述其  
猶未瘳耶午後周申甫同客俞生來俞善製胡  
麻爲服餌云服數日便能改容約以明日買藥  
試之二更聞窗外微雨

二十一送袁微之至唐氏拜壽胡順所先生頗  
欲以玄門秘訣相授當約日齋而請云得奉化  
之仇村水中礦石及山東煤可死汞亦一奇也  
二十三雨午間有晴意俄復雨山東淄川令馬  
君書至意甚鄭重開緘喜溢北土人士多情乃

快雪堂集 卷之四十一  
爾耶

二十八有微雨索肩輿省黃伯仲湖中烟景今日妙甚田子藝歸方山已十日矣吳門陸文學來辭以入山蓋主人倦客而僮僕俱差出難爲供應耳夜雨徹明

六月初一赴陸少白湖上招與仲淳同汎湖至金氏園看石甚奇卽宋之聚景園也又至雷峰塔乃還今日湖景乍晴乍雨在濃淡有無之間初三袁太冲先生來同子晉出城看黃白仲遇

來道之于錢唐門遂同行今日同敘者黃白仲太冲先生及予輩三人太冲先生先行余四人者至寶所塔奇石處徘徊良久復步行沿湖至西泠岳墳汎舟而還仲淳存吾赴少白召宿其署中見新月

初八晴陸少白約入湖晤於柳洲亭由慈雲嶺至天真書院天龍寺小憩太極亭四山廻合中涵一珠乃故宋郊天臺也自江氏墳度嶺至第一橋登舟至雷峰上山至金氏園而別

十八日思梅來午後忽有涼雨一陣微雷爲米子華發方衆甫何士抑二書夜雷電交作且雨電中火光散迸甚奇呼婦觀之云生平未之見也既卧雨止而星出矣

十九日俗傳觀音成道日舉家齋素黎明天氣稍涼復卧夢從先人登一山樹木蒼翳屋俱傾圮惟饗堂數間獨存既登山遇屠長卿在山倏忽復下見先人先人曰此山恐勝五雲予曰五雲奇偉此山似不如但秀麗耳予久不夢先人且

一丘未定此心日夜如搗此夢或先人啓之與紀之以俟其應徐德夫來徐府學以二等三名入試戴升之以第六人進學君實蓋夫尚未發落林玄江來乞高訥軒館長書高任江西贛州道叅政

二十四日滕撫公來略譚陸少白之才而屬之滕云知陸之才與其守但惜其少從容之意耳索嘉興縣學案觀之君實得第三夜涼

閏六月初一方生文烈徐生可求以送課來午

後殷雷微雨冀其沾潤而不能奈何

初四陰沈認卿來知少卿比部卧病昭慶子晉自佛慧歸看少卿于昭慶譚敘良久尤器之來餉新刻王日休淨土文一帙夜涼單衾猶寒初八五更聞大雨甚涼天台蘊空京師謝賜大藏回帶仰崖瑞菴書到後自石瀨回仲淳未到得妙峰報書取回堪輿一貫一冊大統曆六冊寄台教圖羅鏡圖各一紙

十三約陸少白泛月日晡同子晉移卧具至湧金登舟遣人邀少白仲淳良久始至待奴子取燈燭于家又良久始自柳洲移舟向淨慈月色皎而帶赤俄頃片雲映之甚佳至淨慈盛小師相迎于路浴而返至湖心亭隱隱聞雷聲有電俄而大風至登舟而雨就寢已半夜矣

十八晴間有微雨賀伯闇來梅谷師來意其往武康乃憇仙林約明日同往龍井呂文學楊孝廉來爲呂親母郭孺人乞墓表家畜建蘭三盆俱以前六月花矣其二再發萼一六榦一三十

餘榦六榦者今日花

二十熱日過中至淨慈拜呂文學從六橋至葛嶺看項生光先遂至松毛場登舟子晉已出兩舟甚敞不蔽風雨信奴以價廉買之不知事若此宿關外月上卽行雨涼甚已半夜

二十四於先生來至靈芝答拜李玄白晤黃貞父快士也譚間大風雨卒至震雷亦入玄白留酌俟雨止取雨具而還途中見大樹三四爲風所拔家人避漏移置架上書頗有顛倒甚涼

二十五早謁蘇君禹方引嫌謝客訪徐子有寓賈氏園甚有野意精舍堪借榻主人又賢小閣四望羣峰離立足稱佳觀因許子有更日爲托宿之計旣歸陸少白已同吳生相待久矣吳名澄錢唐諸生黃貞父來面訂山中之約今日甚熱方次卿來夜涼

二十七熱周叔宗寄筆四子晉分其二

二十九仇先生來季生大觀自北來季以密書籍爲諸生食廩以冒籍逐歸薄暮蘇君禹書來

見示爲盧思仁作桐江古詩二首夜微涼  
七月初六作真實齋課士第一草序李君實尊  
公來連日稍涼

初十樂心夔來項玄池來陳如崗來晚得陸少  
白書月甚佳二姐還小女瑤芳甚慧雞入棧房  
地板下家人不能出芳曰何不驅一狗入時六  
歲耳

十三五更聞雨聲甚急早晴日中驟雨馮鑑之  
李君實來道之戴升之四人會考夜涼無月今  
日甲子雨  
十九嚴蓋夫不辭而去自十六至今日薄暮雨  
點始住更餘見雲飛過東月出甲子雨庚午晴  
凡七日

二十四晴同子晉至來九山寓同行市肆買書  
得宋陳子兼捫蝨新話十五卷共四帙抄本宋  
汪彥章浮溪文粹十五卷二帙古今逸史二十  
六種二套孔叢子二帙何元朗四友齋叢說八  
帙事物紀原十卷菊坡叢話二帙宋李泰伯集

五帙宋陳瑩中尊堯集一帙宋楊誠齋易傳四  
帙唐一菴語錄一帙舊板莊子三帙

二十七黎明候蔡大叅見謝以出月再晤遺才  
案出馮鑑之得取亦一喜也晚有風夜半微雨  
八月初四沈祖均取儒士應試項曹兩生俱有  
名妙峰法師梅谷禪師來梅谷索送行脚文許  
十三巳前酬之

初七看考官入簾按君先期憂去鹽使者代爲  
監臨酌李君實蕭子雍戴升之來道之于月下  
子晉陪招而不至者張于燕升之擲色得六紅  
初九下午知場中七題惟論語題最新遣力齋  
榼至場前迎朱先生及君實輩夜月甚佳  
十二陰今日俗爲鹽生日雨則穀不實薄暮仲  
淳至與于中南俱俄而中南至意甚隆厚其尊  
人見素亦附禮至留宿桐花館

十三拜蘇君禹學道具湖舟酌中南子晉陪仲  
淳初欲行以病不果憇湖舟中登舟仲淳遣人  
取粥米磁鍋待之良久而至遂發舟至一橋登



陸至岳王墳祠前刪去民居可望南山氣象加  
偉至靈隱遍探飛來五洞步至下竺徘徊三生  
石而返登舟至三橋飲隄上良久登舟如湖心  
亭人舟雜沓乃如陸祠遂歸

十四同中甫沈祖均子晉觀潮六和塔未至里  
許江岸悉爲潮齧下車步行甚艱旣午潮始至  
初聲殷殷自東來漸巨有如岸者絕江而至漸  
近漸大聲振天地真奇觀也至淨慈居然亭中  
甫告歸送至長橋而別

十五中秋晴早拜許少崖壽塔拜項正宇作程  
盤室乃尊墓誌銘月甚佳得朱汝虞書  
十七酌蘇君禹由錢唐門登舟至于墳登岍至  
龍井復登舟泊湖心亭而返月甚佳

二十請沈晴峰明日飲齋中因聞應天三題海  
鹽司訓林先生因仇乙泰見顧林閩之莆田人  
名集鳳昇巖館兄之從子賀鼎昭同其弟來成  
一題七義因自序之熱陰買徐店舊書若干種  
二十二今日余四十一歲生辰也陰時有微雨

加袷衣沈生祖均來道之與食麪孫存吾有過宿之約不至

二十三孫存吾早來言別語余餘姚呂公諱元者所刻皇極心易覓得之大有益于數學遂別約梅花時再至鄔汝翼至方談玄次而嚴蓋夫來示之一題七義沈晴峰來二客避去陰驟寒再加一袷衣監字有寒色

二十五吳權石孝廉書來寄竹匣一枚甚精緻大時壺一枚陸少白忽來告別以新照磨到將讓衙齋今夕家眷出城矣明日約少白過我午飯且爲西溪之遊寫吳孝廉報書

二十六常熟姚老名允復者來訪年七十六矣而甚健有志蓮社慕余而來會稽諸生王驥德因季大觀執質能詩以其業獻亦清美可取

二十九陰揭曉相知無一人中者送君實升之歸攜李劉雪泉早來視婦疾稍減

九月初一夏瀛峰先生來赴雞黍之約沈太公陪晤陳大酉言及場中事渠閱書經卷百五十

中式七人寧波唐司理閱三百卷僅中六人三  
學博各二人乙酉黃葵陽典閩試書經止三房  
業師夏瀛峰與張誠吾二人主之各中九卷此  
則通融不拘定數與前例不同因紀之拜蕭漢  
冲修撰而歸

初二晴河南商城方外王君見訪再至矣見之  
以辛酉舉人仕爲縣令棄職養母母歿遂走方  
外蕭漢冲來答拜漢冲云今科孟義士子以形  
性對講者俱不錄而首題無主意因誦解元首

作以爲極佳令九十人者遇余未必盡錄也主  
司意見士子遇合亦豈有數乎因聞江西湖廣  
試題各三漢冲去王君出王君善曾源泉清余  
與曾別五年矣王君別余朝補陀大士去約半  
月後來

初三早兜轎往西溪途中物色無不愜心旣至  
瑞亭出迎因至山莊閱視竹樹森茂大異舊歲  
新得錢氏業尤佳欣然有家焉之志過日中存  
吾始至云金山石人塢二穴俱佳金山尤勝錢

養微設茶相款迫暮而出六具卦金山六  
初四雨聞順天三題熊存吾回至芳井果有所  
得與夢境合奇甚存吾入山占之得无妄之噬  
嗑曰无妄之疾勿藥有喜數得九千九百九十  
四三乾一兌純金之數秋令金旺主得大地非  
一因識之

初六辰刻出湧金門渡湖至龍井諸君已進老  
龍井方迎之行數十步而相遇讓肩輿老丈而  
與存吾子晉沈祖均登碁盤石初問途登歷甚

艱逾四五峰復下而至一石甚巨左有石筭四  
五屋居石上僧扃戶而出索火烹泉不得坐石  
上良久尋別路而下路亦甚澀賴林而行至大  
路坐草間德周上人索民家茶爲供乃別  
初九早赴寶所塔待蕭漢冲良久客至坐天然  
圖畫閣至山眺望而別

十三夜得徐孺東書見順天錄王公子辰玉發  
解董玄宰第三與岳父約詰朝遊大雄山夜聞  
雨俗忌此日雨有九月十三晴釘靴挂斷繩諺

十五早飯同熊存吾岳父步行出錢唐門至松  
毛場買舟循餘杭塘至女兒橋西北行約二十  
餘里至大雄寺一路綠溪紅樹甚佳里人王某  
有舊識訪之不遇少頃追至舟中邀余輩回不  
得隨至寺中而返寺興于宋嘉定間僧云有舊  
碑壞于洪水僅存碑記索之亦不得隣僧設浴  
主僧設粥宿危樓中甚安夢登鳳凰山于其下  
開一方取土又夢先人方葬却無柩先人面體  
悉露而目動與內人驚視大哭不知主何祥也

今歲六月一夢先人至是再豈先人終當以今  
歲襄事乎醒來夜月甚佳

十六粥後登大雄山東南則武林諸山東北則  
高庭北則駱山安溪平密諸山西則餘杭舟枕  
俱一望而得雲霧宿于山腰峯頭俱顯由間道  
看一地天財形蘆花裊龍亦佳物午飯訖遂從  
梁渚大道還將至北關爲糧船阻塞登岸步行  
數里覓肩輿歸滕撫臺來訪不知何故又得錢  
孝廉魯南書周季華書

二十四午後赴黃貞甫山中之約同夢得步行  
至錢唐門登舟至金沙灘步行至靈隱憩石上  
而遣人覓貞甫寓良久得之入見主人喜延入  
面軒藝竹甚佳宿小樓比五更聞鐘聲始安寢  
二十五貞父見其門人陳生張生羅生者絕佳  
是日以母病入城遂同貞父三生由寺左覓路  
登北高峰凡八九折五六休而後至巔上有觀  
音堂最高處爲靈官殿道者獻茶峰有岐路二  
一通武林山石人嶺可達西溪一通佛慧芳井

生平慕北峰此爲第一登矣天竺僧芳公隨行  
歸途至韜光食芳公餅飯貞父寓閱諸生文陳  
生爲優陳名景華字茂實宜興人輿至遂入城  
早開霽日中以後陰歸途風作頗寒夜雨  
三十卧内富陽舟子促登舟隨潮而仲淳以赴  
郡公召不果早行期薄暮出城昏黑至槐樹下  
泊舟處已失舟所在立津次待稍久仲淳同存  
吾子晉去覓舟而余計卽不得舟當托宿江驛  
遂携蔡君康生行至驛中方展卧具煮粥而蒼

頭至已得舟矣待粥熟進二碗而行舟人負行沙上百餘步始達舟僅兩艙臥六七人至不能側身轉足四鼓乘潮發舟耳中轟轟又東北風甚急舟行如箭良久始定睡醒已行七十里十月初一日高而起掀蓬四望青山紅樹映帶大江信奇觀也午至富陽縣縣大夫程君出視客因入報謁贈一舟頗寬晤餘姚邵君名圭梅墩之弟日晡齊夫發舟更餘至場口初二早遣帖拜徐鶴山鶴山先來謁名墩有喪

拜鶴山卽往永安寺十里上山又五里達寺遇二李及地師潘翠橋卽爲李剡望葬母者登其地正吾輩所云天吏者也寺甚寬平向西南曰高皇帝曾駐蹕北有高僧純一初爲高皇所禮後見法其臨化詩云雨下天流淚雷轟地發哀萬山齊戴孝斷送活如來可以知其人矣高皇有御製酬應詩卷藏于寺後爲周肖一取去一初詩卷藏于橫槎何家何翁言如此是夜宿寺僧瑞峰房李氏供一僧號妙峰築室殿後

李氏卽李小剡之族深山大澤龍蛇所由生也  
一笑

初三五里至火爐圈何翁來迎夜宿何氏所居  
卽橫槎山也翁名行儉字天德號守川故爲吏  
橫槎內通浦江深曲可避世與仲淳甚樂之宿  
何氏樓

初四何氏出一初手卷相示乃是鄉先達李巨  
川鶴山親舍圖詩後誤入一初爲李巨川作集  
詩題序文甚類儒者卷內有嘉禾何峻何煥二

詩甚清美此吾郡人竟未嘗聞其姓氏何氏設  
早飯送行坐竹筏渡溪此生平所未有數里過  
壺腹山石門甚奇傍有二石如筍子晉題名其  
一其地李公燾所生源內李氏及居小剡者鄉  
人云俱其後也十里過陸宅坎小憇復遇何心  
齋留茶又十里達場口鶴山已待于山房矣相  
款至日夕浴而登舟聞之鶴山仁一初墓在場  
口山下

初五雨早至富陽拜周執贄卿孝廉日中揚帆行



二十里避潮廟山下夜東北風作

初六早轉西北風開船甚疾行六十里復轉北風又雨轉三折處甚艱至巫山灣咫尺范村而不能濟夜雨止風甚急一夕再三警視殊不息未知所稅駕

初七天明風漸小遂發船卧內聞搖櫓聲甚費力抵范村日出風和遂有生人之樂矣上岸憩水近江宅由山道抵排山父殯叩首而下將至徐村遇仲淳輩抵赤山埠渡湖自湧金門入城

至家出題課兩兒及周氏大兒作文孫侯居自金壇來候仲淳相見一宿書舍得陸茂才基誠書以南山上人道場相屬此行往返凡七晝夜初六日爲驥兒十六歲生辰裘氏乾娘來赴開鎖之會以今日返卦碧峰自往求之得律卷二字上二人同行又有筆象下眷字頭并自己應與渠親眷一人同事上十畫下十二畫成隨四爻變隨有獲貞凶有孚在道以明象曰有孚在道明功也變屯九四乘馬班如求婚媾往吉无

不利象曰求而往明也互漸女歸吉利貞主自求決得夜婦病寒熱月甚佳

初八孫侯居來留飯改房門于西北因婦坐起處多風而易之也薄暮婦起大晴月甚佳

初九同仲淳存吾岳翁三人赴傳養心菊花之約更餘而返因得見江西福建二錄陰下午雨徹夜陳孟常來黃貞父來

十四陰雨來道之來午刻請嚴以訓公子東樓子弟四以訓通曉方術近傳服食大丹訣于王

野極先生願家于浙盡以其法相示夜月甚佳二十九婦生日包心韋親家至留飯得許做菴湯義仍報書

十一月初四冬至微霜奠祖先吳少君來留飯邀何生洪江同敘約何生看鳳凰山

初六江子振致燕窩菜海粉代鹿脯龍眼同何生看碧峰西溪諸山午飯佛慧方丈宿瑞亭禪舍夜月頗佳

十二陰雨蔡念翁送舟午刻登舟行至謝村暮

風急甚遂宿于此謝白淵如期同行

十三風雨如昨時加霰雪宿德清之雷電鎮一  
鼓德清宋大尹遣吏送夫二十五名作書答謝  
之是日白淵見示玄旨

十四天明至南雙林天晴寒甚過潞村易小舟  
未刻至峴山寺子晉俟居出迎喜甚子晉云曾  
望弁山積雪不予笑云已得之矣甚暇無事欲  
走夾山漾訪錢仰石俟居檢視藥餌踟躕間偶  
黃桂峰先生來訪遂同登峴山之巔由右麓而

下桂峰先生自長興來携得白甘菊點湯試之  
甘香清冽方散步山南忽聞呼聲仲淳至矣奇  
哉時已日暮桂峰先生辭去舟中小坐未久仲  
淳子晉辭詣仁王予與俟居謝先生楞嚴二上  
人登峴山玩月恨子晉仲淳不在耳晚飯舟中  
復至山南曠處觀月飲門冬湯與俟居別遂宿  
舟中

十五移舟青棠橋與俟居同宿仲淳以是夜開  
壙卧中再三偵消息不得甚念之同周氏伯庠

仲大等步月橋上

二十仲淳詣烏陵爲開山計余與子晉侯居約訪錢仰石余且弔其喪途中遇周汝賢叔宗猶子遂同行薄暮至主人出款客精舍修潔似改舊觀余兩歲不至矣夜別周汝賢自十四至二十月甚佳

二十五雲晦黎明發舟行九十里至平望日方中陸敬承尚未過又七里爲三里橋及敬承舟沈茂仁亦在敬承邀之出也妻子幹亦在自武

林相從者又晤豫章劉解元方從乃師北上坐食頃茂仁別約明日午過之遂送敬承夜至白龍橋距吳江十里以築壩不能前談且飲至四鼓月上過小舟子幹亦別敬承附予小舟

二十七早過朱長午館遍遊園亭諸勝午後見款堂中同敘沈志堂先生項正宇傅瑞郊樂甚懼而罷志堂先生乃郎茂才有尚書璞玉山斗二集弘正間名家時義也見河南湖廣二錄

二十八長午見省卧内因誦茂仁南歸篇什約

二十餘首甚清美愜人命僮錄之茂仁索余引  
語午飯辭行是日陰晦且微雨晚至嘉善將十  
里遇盛叔永一酌而別宿湛如齋中

十二月初五早約李生輩四人再晤遂放舟鴛  
湖登煙雨樓拜屠冲陽再至煙雨樓晤四生項  
生不至風大作咫尺千里以小舟渡赴史使君  
席盡驪而別至西關登舟

初六早有霜沈茂仁書至沈夫人致問老妻夜  
宿皂林茂仁紀行及詩索予序并文卿夫人墓

誌銘俱以此日屬草月色甚佳

初七有霜銅瓶始冰過高陽莊鍾少石孝廉饋  
反毛烏骨白雄雞余云乃令其雌孤棲復以餽  
余夜宿大茅行二十里文卿夫人墓誌銘完草  
初八未明發舟至落瓜方起盥櫛見臯亭峰翠  
欲滴甚喜日晡至此關薄暮抵家拆書牘二十  
餘通仲淳在徐村觀兩兒文課似少有進益晤  
來道之

初十陰晦往徐村出清波門仲淳與陸沈二君

快雪堂集 卷之四十八  
先行余至徐村一謁繆母兼鎮撫之柩停土地  
堂甚安主僧尤篤實可托途中山青江碧天黃  
霧白氤氳變合洵是佳觀是夜仲淳穉咸時仲  
宿于齋中得田子藝書

十二雪霽日出禺中至玉蓮亭遲李仁卿日中  
田子藝至先飲者再俱醉黃昏仁卿始至上席  
食頃罷酒登舟享仁卿席舟出西泠沿孤山而  
返積雪在山明月相映可謂不夜薄暮都闕君  
宴客鼓吹放煙火如星如月飛空而下與子藝

憑欄看之亦佳觀也三鼓至家復與婦小坐雞  
聲忽喔咿陡作知四鼓矣姚善長至未得遇之  
十八赴文卿題主之請易服至墓所行奠日中  
索肩輿同仲淳至城山晤藏師兄師兄言臺山  
無邊師捨道場事甚奇世乃有此烈丈夫細談  
至夜分而卧城山屋宇甚固此止菴之功主人  
以規模稍大不易完欲改造甚無謂城山積雪  
無恙眺四山如積玉亦奇觀也夜星月皎潔  
十九晴下山與藏師兄約會于彌陀寺夜與藏

快雪堂集 卷之四十八  
師兄敘譚良久商榷莊子養生主出蕩然淺解甚可笑臺山空印者作駁物不遷及正心論從藏師兄借觀仲淳是夜醉卧不得別子晉穉咸時仲同宿舟中

二十一立春東南風甚大舟行頗艱晏起盥櫛畢已日中矣過敢山數里宿孤村下夕陽甚佳二十六陰金不佞致林懷玉書見贈七言律二章南山老人乞持護道場午後金不佞來夜半後大雷雨先蟄而雷恐非吉兆諺云未蟄先蟄

人食狗食

二十八陰早有微雨如絲閩人林大東來得高訥軒報寄秋蘭四本甚佳茶甌二十密乳皮二器答林懷玉詩二律屬金不佞致之蘇君禹來掛高祖以下真設供檢括藏書天地玄三號夜微雨雷電因林生叩其乃叔玄江起居知以聞劉姬訃入燕矣劉故本司角妓予辛未赴公車曾識其人

二十九陰雨且雷蒸潤如黃梅時金不佞來赴

快雪堂集 卷之四十一  
過歲之約

三十晴姜子幹來敘談半日餉子幹母夫人熟  
物夜行家人禮如丁亥除夜儀益以三姐作戊  
子除夜詩未成

快雪堂日記卷之四十九

秀水馮夢禎開之著

巳丑

正月初三日飯閩人林大東尚炅之從子尚炅  
喪妾劉字鳳臺故角妓辛未歲識之曲中賦弔  
劉娘二絕

初六日方士謝白淵自四明至得屠長卿書謝  
京口人二子從婦翁法相寺禮長耳相真身此  
日爲下生日祈子者競往焉補歲前十二月吳



快雪堂日詩卷之四十九  
興石城山晤藏師五言律沈太公見贈五言甚  
佳老人只合賦詩飲酒以遣餘日牙籌損歡惜  
也

初七日是日稍晴和與客遊吳山兩兒從客姜  
子幹者喜談堪輿謂鳳皇山有佳地引余驗之  
許然明跛而從許武林名士

初九日是日始泛舟西湖兩兒與客從過汪氏  
莊往歲熟遊處庭梅甚馥過林君莊名梓壬戌  
進士仕至郡守久居湖上歲前投余詩遇黃伯

仲將從王季孺太史渡錢塘始知季孺過除於  
此季孺名苴四明人癸未館中最有才名者苴  
與苴草之萱同向不作此讀叩之季孺亦然

初十日早霧午後陰晦內人謁天竺大士且率  
鷺兒展視妻兄啟俊之殯鷺兒其養子也余與  
驥兒從沈太公待之第二橋日中相見同至第  
四橋道西泠而返藏師與幻居上人繆仲淳周  
季華至藏師乞了然關主塔銘季華乞母薛傳  
幻居名真界善談經所著楞嚴物不遷新解大

有勝義

十一日風晦漸開下午甚寒春來所無仲淳從藏師往徐村幻居留商因明論藏師宿於徐氏來道之與婦歸寧外氏來婦爲余婦之姑而少家人呼小姑者

十三日盛叔永來與藏師仲淳共飯伊蒲而去夜張燈杭俗十三至十七謂之五夜燈始於錢氏建國時

十五日晴幻居自西溪來藏師將以明日往雙徑來道之忽欲從行太奇事阻之愈奮夜月甚佳

十六日藏師幻居仲淳行道之從余實激之與藏師約清明前晤於郡之楞嚴寺步送將至北關門里許而別

十八日早有雲氣泛舟至金沙灘過橫春橋何氏園觀梅梅數十株身幹甚古西山當爲第一花下進數酌泛西泠斷橋而歸二子從昭慶訪叔永遇仇君采於寺門自十四至今四夜月甚

佳

二十日仇生夜至留宿看玉臺新詠

二十一日赴蘇君禹學使席於湖上同馬心易  
遊紫雲洞余請告時屢遊其處又至何園看梅  
香雪滿地然無損爛慢倚牆桃花一樹與梅爭  
色坐酌良久同心易禮岳鄂王墓君禹待於六  
橋同步堤上遇桃蕊最繁處進一酌數酌而至  
四橋憇龍王堂後軒軒面西山三司諸公釀金  
拓之工尚未竟是日陰停午見日色風彌勁夜

聞雨聲

二十三日早婢報雪登樓瓦盡白矣謁蔡大叅  
名廷臣豫章人自吾郡司理入臺樂親吾郡人  
士善余於庶吉士時自副臬轉今官朱良叔先  
生赴館知沈壻紹元夫婦自白下還海上蔡大  
叅來報謁且見招訪同年王恒叔名士性臨海  
人能文而有聲諫垣時已外補

二十六日陰午後雨赴蔡大叅席蘇君禹陪泛  
舟至龍王堂坐後軒君禹議以軒祠樂天坡公

和靜三賢君禹作記回舟雨甚二更底岸

二月初二日晴微陰杭俗以是日粉米爲糕著蓬葉其上滴糖而噉之謂之蓬糕此日又爲百花生日晴則宜花凌元叔召飲同姜子幹二許然明令慈遊真聖觀觀有朱梁開平年碑楊凝式書半已剝落又有蕉池呂仙舊跡遊青霞洞在寶奎寺旁洞中有石如蝦蟆蹲踞主人琢去之此當與堊華陽洞之人并案者也華陽洞在吳山楊廉夫舊隱洞石玲瓏突兀主人堊而平

之越凌氏莊面大江可捫越山登城隍山

初六日晴帶微陰詠雙頭蘭詩陪朱良叔夜饌良叔方謹余樂閑曠以故不能數陪

初八日晴微陰然明輩期晤湖上而余復作主飲項庭堅庭堅名德禎丙戌進士邑人藉羶飲桃花下甚暢薄暮底三橋覓小刀還

十二日陰飲蔡憲使蘇學使湖上風甚僅得至第五橋步看桃花至四橋雖有落花而紅艷未減憇三賢祠水軒燭未易而兩使君俱醉作主

者余與項廷堅廷堅爲撫公所留薄暮始至大雨達湧金夜漏一鼓矣寒

十三日陰與項庭堅訪黃貞甫于傅氏山莊莊近雷院遇雨溪溜甚壯還至岳墓廷堅賈壯丁徙銅人于墓前銅人向在他處廷堅微時欲徙之爲市人所易故有此舉晚憇昭慶僧舍旣歸家人云城中有雷十里間氣候不齊如此

十九日往越中許然明姜子幹從自浙江驛渡江至西興易舟縣令劉君來名會閩人丙戌進士報謁劉令於鎮海樓樓際江宜眺望初夜至江邊望月二更君禹方渡相見舟中遂發飲至夜半

二十一日遊禹穴出五雲門南行五六里而至窆石甚奇長不能丈有斷痕上有竅禹陵在山下舊不知所在某郡守以意爲之登山之巔然明盤跚山椒而已去禹穴二里許爲南鎮祠祠會稽山神山有九峯自南鎮返赴郡倅張君之席席設於臥龍山之豁然堂甚宜遠眺惜昏黑

耳同年王君在坐張自許善堪輿談吳興形勝頗悉夜聞雨聲

張名佐治甲戌進士故爲長興令

二十三日清明欲往蘭亭以陰雨不果而往弔張太史墓張名元忭辛未狀元報謁商大理是日赴毛令之席席設于應天塔許玄度後身所建殿後爲堂祠之同毛令登塔徑甚窄如入螺殼中二級而止其旁有靈鰻井今涸子幹病

二十四日早雨赴商大理之席席設于土城山之莊居越王勾賤夫人教西施歌舞處門生王

伯駿從名驥德商君見其第三子山培塿耳而際水精舍數間覆之頗幽勝主人之壻陶孝廉讀書處爲余亟稱之後旬日而省元報至越中士大夫肴饌俱麤惡不堪下箸商君席品物精美又出佳茶甚駭物色之以有吳姬故吳姬能變越俗亦可尚已下午晴至昌安門別王生亦名三山門晚至蓬萊驛然明云早可望海日所賚天池茶已盡從商君乞得少許色味如新吳姬所藏也夜行底蕭山

二十五日早霧漸開別劉令於縣齋而行徐伯  
魯之父攜其孤哭拜路隅見之惻然少捐恤之  
徐名省吾有文死于長安邸遂渡江雨及淺沙  
輿人入水推舟徒涉者甚衆旣舍舟肩輿行沙  
水中二里許始達草橋門鹽舍鱗次掩映菜麥  
亦佳觀也是行也往返七日嘗論越中山水在  
武林之上武林不通舟而越中百里內外俱堪  
臥遊無跋涉輿馬之勞一山一水無不清疎有  
意城中水道街道俱潔靜夷廠堪久居耳

二十七日午前至湧金湖船候同年胡君良久  
胡至得閱邸報見饒比部伸論科舉事疏比部  
業以奉旨受杖削籍矣胡酒量極高人尤朴實  
議論亹亹俱入聽歷于墳龍井高墳而歸酒二  
大盃俱竭紹興理陳君遣存且乞大隱園記  
三月初一日陰雨間露日色鄉同年沈長孺來  
述華山之勝甚悉并登陟之艱令人神疎沈名  
一中庚辰進士爲儀部郎箕仲之從弟也  
初三日招王季孺沈長孺孫子貽遊湖姜許二

君陪歷四橋水軒自岳墓西泠橋而歸公車報  
夜至杭士三人申甫落羽未知吾郡登幾何人  
耳

初四日徐文卿遣謝送葬致鹿角膠十斤耗三  
斤得同年盧思仁書名洪春以祠部郎諫言削  
籍姜許來約明日西溪採茶然明借楊升菴詩  
話對舊本補錄二葉歸之沈太公新月甚佳

初六日採茶子幹監炒如法得茶一斤余先歸  
樂子晉自吳江至無月爲盧思仁作易水歌

初十日子幹出山柴老餉龍井茶一斤試茶安  
樂山香勝龍井味勝豈炒製不如法損其香耶  
作徐善人墓誌銘

十二日早陰訪同年張君於淨慈登慧日峰此  
日爲巳未日不宜雨楚人黃廉爲余言戊午至  
癸亥一日雨後甲子當十日雨夜雨徹明

十三日早細雨同子晉校坡公集本傳二十紙  
僧曇旭至得藏師書有北信索傳伯俊侍御書  
訂南來之約達觀老人方自峩峩返南嶽將往



從之遂付二書去藏師約是月二十三日以前  
會于樵李同往吳中

十五日晴微陰問北關同年何君病相見榻前  
何滇人名文極午後同子晉遊書肆覓書得抄  
本鑿壘元戎傷寒寶鑑唐韻繪事指蒙考古圖  
共五種

十八日甘寢晏起且興往西溪道遇箕仲申  
齋中之約許諾俟之良久而至出二子談叙至  
暮白君訪其鄉人運副帥君名機字惟審以讀

書飲酒自命前爲郡守謫官於此先遣名刺因  
白相聞

十九日謁帥惟審而惟審出門訪余且惠詩集  
竟相左訪許然明於齋中叙別同子晉子幹去  
然明齋數武有慈雲寺並城對池意甚瀟灑登  
殿禮佛後殿施食臺甚古鳥啄處跡深數寸有  
竹數千竿夜步歸然明父子送至靈芝寺前帥  
再至多情甚矣

二十三日遊秦駐山得一小山三面俱海逆而

向西壻叔騰龍從沈壻追至始皇廟竟相左遇  
於天寧觀楚石衲衣是日立夏

二十四日粥後步出城待舟於天寧寺觀楚石  
鉢沈壻兄弟送數里見董生于思而善絲竹月  
琴三弦子尤妙又吹短笛甚哀怨是日風順午  
後挂帆昏黑抵拙園草長及人索燈觀牡丹謝  
久矣午後有微雨

四月初一日放舟迂道從學士橋至惠山成黃  
水部送行文去妾怨送孫子貽守惠州詩將至  
惠山遇藏師文卿仲淳徐繆赴李令約藏師留  
余舟取惠山泉二十罈是日晴夜雨徹明夢梵  
僧指示佛法跪受之以竹筒吹左耳覺腦中清  
涼隱隱數聲如雷而止

初二日雨文卿別去仲淳送至毘陵藏師約晚  
晤西郭外忽晤姚善長入城弔喪同館萬憲使  
內外艱前輩孫太史以德內艱顧國學祖河外  
艱而監師周倣翁卽世未滿制訪顧吏部憲成  
弟進士允成謁李令名復陽豫章人赴萬憲使

之約飲於別室登舟藏師已至李令招飲他舟  
二鼓別宿南門

初三日陰微雨行三十里而起作了然關主塔  
銘至滸墅晤同年黃侍御名鍾吳人時有茅山  
之行賀民部置酒相招出其子嘉震弱冠能文  
出示去歲石湖九日詩三章并高會圖顧實甫  
作序六朝體甚工又和詩三章陳伯符和一章  
大雨

初四日早雨午後晴同藏師飯於穉咸齋中雨  
中杜鵑甚佳閨門晤盛叔永無錫令李君來飲  
叔永舟中二鼓辭去市茉莉三本是日聞滕撫  
臺之訃是前月二十八日滕頗畱心民事災歲  
倚重而一旦殂隕甚爲傷惻

初六日早訪顧實甫別實甫九年矣添一子三  
孫實甫丁未生長余一歲耳晤同年給舍張君  
王山人世周張名棟初任新建令丁丑至今未  
嘗一握手也世周名伯稠能詩而其人朴茂有  
上皇風實甫之親自武林別後亦三年矣實甫

新宅園亭竹樹甚佳宅背崑山樓曰背山樓實甫嗜棊方與二客對奕而世周不解棊坐其旁神色不動後余作看奕詩頗記此事二更登舟初七日下午到葑門訪同館張都諫張名鼎思爲房寮所訐謫官步入城訪管登之將至里許遇曹先生胤儒曹以貢仕至今長留心天下事尤精水利遂同行旣至登之自天王堂歸畱宿曹二更別去登之見少子與驥兒同歲初八日訪曹先生苞太公苞有別業在葑門內

與媪有言避居於此三君子報謁舟中談甚久放舟南五六里且飯有相物色者旣至卽子晉也下午至吳江訪沈少卿方納吳姬許作詩嘲之少卿云縣令趙君渴欲一相見立遣報之方就季華晚酌而令至矣名夢麟北人丙戌進士出趙定宇先生之門期明日相招月甚佳宿季華齋中

初九日謁趙令晤張孝廉九苞吳人赴趙令席於周氏園少卿陪令君資性機敏通曉技術尤

善琴能彈五絃成聲飲至二鼓宿舟中

十七日晏起包太公自吳中歸矣云遊太湖之橫山主某氏表兄屠君宗聖之館舍王人也甚賢待余遊頗切謁嘉興新令蔡君於毓秀癸未進士閩人與張博士厚托寄聲余訪陳孟常看嚴蓋夫藏師書來歸華嚴論

二十日藏師來議刻經緣事夜夢一僧東南來破壁直至榻前驚而寤今應之矣赴吳君期同李君實夜歸初見螢火

二十七日余自十三日聞三弟沈氏之事此日始竟凡半月幸以柔道收焦頭爛額之功然亦勞且費矣而瑞錫之勞費不減天下本無事庸人自擾之可嘆也飯於楞嚴包太公來啜甘菊湯而去是日晴

二十八日問朱汝虞疾見年伯封君名建侯安貧無爲封君之絕少者以藏師招至楞嚴與諸善信定刻經之約同盟者包氏父子兄弟張君如鏡陸公子基某與余六人余作盟詞余婦正

月發願歲出五金余再出五金共十金刻經二  
卷餘善信多寡有差晤雲間康孟脩徐孟孺同  
明卿移榼訪沈純甫夕陽照地矣

三十日行十里始起捉髮此月中所無至橫里  
已暮遂泊舟夜微雨

五月初八日婦病略甦梅谷上人自閩中還憇  
瑪瑙山居乞米一斗又乞茶入梅十餘日而無  
雨甚爲農事危之看黃山谷集

二十一日乘月開船風順下午遂達顯山寺將  
至風轉西南里許行食頃頗艱仲淳相對不能  
抽思完文債下午同仲淳造逸老堂閑坐仲淳  
戒童子烹茶爲供昏黑還舟

二十二日仲淳往烏陵山展墓余至滴翠軒作  
幻余師兄物不遷解序因明入正理論疏序澄  
公正心論序又作送藏公還清涼詩送樂子晉  
北遊詩甚熱

二十三日撰周母薛氏往生淨土傳日中藏師  
兄同周仲大季華至以待周氏昨始自楞嚴發

舟談叙良久看周母傳遂往城山約二十五日  
日中會於此再作因明入正理論疏引藏師不  
許前作示意更之作清涼禪院記

二十四日道場寺歸雲菴僧勺泉年七十八矣  
持孫太初手卷相示卷首連璧二大字太初所  
書後有詩數章後綴諸公詩數十章弔太初詩  
惟鄭少谷五言四章最佳太初未娶時常寓止  
此菴後遂葬此空同作墓志有碑僧欲募化置  
墓田四五畝乞余作文余許之亦許作詩弔太

初附卷末舊道場有四菴俱富爲役所苦老僧  
自十餘歲當役至六十餘今十餘年來貧而逸  
矣作擬古詩三首水鵝鵠行一首無題二首下  
午雷大風今日時盡相傳此日不宜雷月月打  
鼓送三時要雨直到立秋時如此則吾民休矣  
姑記之雨一餉而止

二十六日早別藏師兄正心論畱閱尊宿語錄  
四函雲門錄五祖演錄又抄本一共三帙付師  
兄北去自峴山歷碧浪湖甚淺澁忽轉北風揚

帆而行亦事之偶然者病目不能閱書得于中  
甫書舊歲托徐文卿寄此日方達薄暮轉南風  
宿三家村早眠蘇州山館四圍靜宿語  
二十七五更放舟過敢山甚淺又逆風舟行頗  
艱日西出五林食蓮子尚稚遲五日則佳矣目  
稍愈尚不堪親書卷兩日清閑亦造物所妒耶  
一笑宿謝村三首水齋點行一首無題二首下  
六月初二早詣海會寺謁天竺大士爲禱雨拈  
香出清波門入龍井薄暮同師之暎山觀一片

雲巧石山師子石

初四拜沈太公生日梅谷師來過中噉茄齏麵  
周申甫來住終日梅谷云建寧有葉居士號心  
舟頗知向慕我輩施梅谷米二斗及茶菜已臥  
信奴回得藏師兄仲淳李君實報書

初五作二子字說顧常甫字說薄暮有虹見東  
南屬之東北而中斷雲物甚奇昏黑疎雨數點  
二鼓至五更大雨一陣聞簷滴聲甚厲

初八訪徐茂吳談踰時遇金不佞茂吳扇見駱



僕和駱賓王秋風詩頗佳引語尤佳乃是姚伯  
道家蒼頭如此人故不可以傭奴棄也初夜東  
北風遂雨徹夜風雨甚涼

初九早起加白布單衣雨竟日大風拔木棹楔  
倒者如千座海嘯江干毀民居若干

初十晴而熱早至龍井翻山至天竺看二地內  
優于外憇長生房白先生返龍井而余入城飲  
葛井水甚甘冷當與龍井伯仲

十四熱閱宗鏡一卷半重裝宗鏡三帙

十五先君忌日設祭無事臨十七帖智永千文  
覺臨池之有益熱如昨

十六今日悟懸肘運筆法常欲使肘與肩平稍  
下則無力矣鍾王復起不易斯言

十七早乘月同白生渡湖看演福地來龍穴情  
明白可用至龍井歸湖邊荷花政發香氣襲人  
訪侯師之留泛月徘徊孤山西冷間比就臥夜  
半矣

三十岳母病甚內人日夜哀苦江生世卿以舉

業謁見終父命也有陳而無雨夜月姪女幼女  
露坐涼風西來大有蕭蕭之韻便知秋色矣  
七月初一理舊書札稿夜大雷雨四鼓而止  
初二巳午時雨微雷得萬和甫顧光宇進士書  
夜甚涼

初三臥內聞貞甫至捉髮迎之粥後泛湖決三  
台山地正穴尚虛飯于茅氏墳堂貞甫爲主歸  
途至金沙灘莊居東芻長堤爲梅更勝僧獻蓮  
子泛湖至錢塘門與貞甫別訪候師之步歸夜  
甚涼夾被五更猶寒

初五回早得孫世行書唐佛子齋到達觀老師  
藏師兄二書四弟餉瓜八枚爲思奴等損其二  
償以他瓜剖食甚甘遠勝此中沙田之種岳母  
決有起色可謂大幸遺唐佛子報徐孺東之計  
於仲淳

初六赴雲居僧智喬之約晤黃貞甫葦航上人  
沈明宇沈善畫蘭竹喬方倡緣建觀音殿觀音  
像一軀青東陶所埏精巧高盈尺蓋宋物也得

之都闡井中山後爲聖水寺基舊有聖水塔塔  
尚存喬松茂樹下瞰重湖足稱佳觀結草菴於  
此可老也小沙彌慧曉坐關寫華嚴頗穎秀至  
中麓房作書老僧淨止出趙松雪寫中峰淨土  
詩卷相示小楷雜草甚佳中峯詩百八首摘書  
五十六首自有跋溫撫臺索觀還其本命臨書  
刻石溫亦君子哉又一冊國初名公詩夏維哲  
司徒五言律四章首句俱用誰關雲居境草書  
妙長有元人之道逸吾郡姚公綬侍御詩一首

詩字俱佳

初七陳心抑伯母明日滿七十元孚茂吳及余  
各作一詩賀之余發傳帖與者凌氏伯姪茂吳  
默菴及余五人來夢得書來餉西瓜十枚并致  
沈祖量書陳敬老爲張浩索負于沈姨夫書來  
相促先祖汝厚處士生忌設祭姜子幹張見菴  
金不佞魏先生來道之岳丈同晚飯夜陰見菴  
宿齋中初更有微雨甚熱

十一昧爽同白君出湧金小憩柳州亭少選中

甫至泛舟至定香橋登岸至龍井既飯踰馬婆  
嶺至天竺又從下竺看飛來峰正結從葛嶺而  
還甚熱周叔宗自新安歸見過得司馬仲淹汪  
座主三書夜小涼

二十一完顧寶幢跋及挽詩書金剛道德幸畢  
一事之負瑞亭來索靈源疏文沈太公索周子  
完跋語

二十二雨辰巳間如注午雨止水利道夏公來  
報詞頗言廣德自隆慶以來困于貪吏狀蓋天

下同之矣寧獨一州也

二十三盧思仁索冊子看馬心易於大佛新安  
吳望江名天洪者選建陽令過此來拜因往荅  
之相見談風水渠甚重理氣婦病小愈

二十五新涼遊興勃勃而無伍乃與婦翁約南  
山看桂花飯而行以壺酒肴榼隨至石屋小憇  
洞中孫中貴脩葺甚整但丘壑少損耳東坡賈  
秋壑俱有題名東坡姓名朱填而秋壑刮去依  
稀可辨此足以觀人心矣洞左取道爲葉中書

墳小屋數椽老僧守之故吾郡天寧僧巖壑亦  
美有靈沼崖題名自石屋而西里許入一山塢  
中爲滿家隴此桂花窟宅也余已卯庚辰間曾  
一至今十年矣將至遇一山民吳姓引至其家  
云早桂已謝此再發者尚未盛過三四日始盛  
三發爲晚桂在中秋前折贈數枝而出其人充  
南都花園匠又充獵戶住南山歸途至錢糧司  
嶺觀外家祖塋懋淨慈居然亭婦翁所未到至  
暮矣

三十日李玄白來坐談半日此月貧甚細君大  
是不堪

八月初六早謁胡葵南太守胡丁丑同年令江  
陰時余頗作客贈遺甚厚此日相見依依故人  
之情報謁余尚未歸召見二子似非悠悠者謁  
按君致顧生際明書乞脚力道家眷北上許給  
憲牌遇同年李稠原名瑄以待御外補僉憲邀  
歸飯之

初十聞王季孺六月十三日訃卒於潞水傷哉

王叔駿來爲余求得陸務觀會稽郡志十二本  
王初陽以屠長卿書來王餘姚人新建之族自  
言深于玄學知奇才以三方及紅鉛二顆見惠  
十一早冠驥子請親戚赴者董樂益唐繼泉鄭  
小官張姨夫四人白先生朱先生金不佞沈太  
公岳父同叙內眷赴者仇氏姨江氏姨陰雨時  
露霽色夜作洞庭東山靈源山居勸緣文早時  
岳父舉一子

十七林先生名集鳳號近村莆田人司訓於此  
與座師陳肅老隣居世家子好客邀余十八日  
觀潮辭之乃就飯其齋中林在京師館於曾見  
臺家與于健俱相善有贈行詩懸之壁下午赴  
謝令席談叙甚驩謝名吉卿晉江人弟良卿俱  
登進士第初任清江令以誤中儉人早致物議  
摘官嶺西量轉浙之泰順令署樂清事曾遊雁  
蕩頗能談嶺西泰順之勝爲人亦爽直洞見底  
裏惜哉以一事往誤不爲公論所與豈非命哉  
夜別女登舟

二十三雨早尚細入城謁兵大夫鄒文谷名迪  
光無錫人甲戌進士能詩與徐茂吳善霍林上  
人自金檀回以達觀師命屬作東塔舍利放光  
記  
十月十四於先生諸君過談午後復病寒蓋瘡  
也不知而啖魚鱗益爲病魔之助矣

二十八日至楞嚴晤曹林師兄曹出唐神清所  
著北山錄見示文甚奇項墨林招陪屠長卿坐  
客葉日葵鍾西星沈純甫得觀褚河南手摹蘭  
亭米元章跋東坡九辯墨迹夜三更同沈純甫  
同出北關鑰不時至待良久

二十九與曹林淨源同訪象先師於三塔夜同  
屠長卿陳伯符金伯韶宿王江涇伯韶余二人  
爲主歌者劉生演無雙甚佳夜風雨大作早聞  
沈太公訃卒以二十七日

三十六西北風先行詣弔沈茂仁哭之霓川年  
伯出迎撫幼孤甚爲傷感晤朱長午白先生看  
沈氏住基西北祖地甚佳陽基舊作丙向數十

年前改午向非宜門前起牌坊空地太多爲賓  
勝主出人少亡方辭主人道遇屠長卿約晤郡  
城長卿以余先行意殊怏怏乘順風薄暮至武  
塘

十一月初二辰刻往金澤同曹林遊金澤寺寺  
名願浩經舍淨源上人修藏經於此又甲申乙  
酉歲有校經之約同事者管登之袁坤儀凡十  
數人歲再往殿極壯麗江南所無禪堂僧數人  
俱守菴專師弟子俱持不過午齋同曹林閱諸

經要集誠女緣數段認卿回遣人相迎相見驩  
甚邀予明日往清浦認卿所居莊有田二千五  
百畝歲入三千餘今年不能半文卿中南吳康  
虞協力所置三人歲輸百金刻藏取辦於此

初七霜宿石門作詩五首

初八微霜宿塘西作詩九首

初九作哭沈太公詩午後至家家人大小俱無  
恙哭沈太公晤來道之道之以前月廿八日至  
初十日看陳公衡周中南傅伯俊下午公衡長



孺中南同叙長孺爲不宿之客長孺論議頗不  
服達觀師且不服覺範法華論長孺新註陰符  
云其感頗異徑山得木葉背面俱書離卦先得  
夢云孟冬淒淒日天降赤芒書遂發意著述又  
云刪張紫陽玉清金笥寶錄人所增益者許以  
一書見示聞考選消息萬茅兩生授御史餘俱  
部屬

十五日中携鵝兒買上河船行甚寒夜半後銜  
冰而行月甚往  
十六破曉至長安鎮覓家舟不得買舟行至皂  
林遇家舟良甚十四日晚至是日早大雪積二  
三寸武林止大風百里之間天運不同如此二  
更至拙園自至日至此日俱寒凍急流無不冰  
者

二十謁梅花道人墓碣尚存題曰梅花和尚之  
塔碑已斷花字已下完

十二月初六早開和看蘇子瞻集本傳年譜夜  
到崇德月暈氣昏

初八早雨霧午後晴晚至八冊同來道之賦綠  
蜘蛛成七言律一首日沒甚紅

十一早雪拜趙明府下午明府報謁宿沈祖量  
齋中來夢得吟唐人律絕幾至千百首鷄鳴始  
安寢夜霰

十二到蘇州訪管先生宿齋中趙審卿亦在陰  
而不雪

十六天未明沈認卿至從臥中起對酌數杯遂  
醺然同訪錢孝廉名士元號心宇弟名士完士

完師認卿兄名令行字茂先畱批閱歷科舉首  
文相欵而別認卿早別去婁東明歲正月二王  
進士逸道家眷因遊京師索京師故人書許付  
陸敬承余雲衢馮用韞書下午至沈伯宏家同  
往馬小橋命肆馬故識我於西湖之上是時沈  
君典來訪同在挹秀莊武林章生者云三個狀  
元不抵一會元章蓋不知君典在坐後覺駭訝  
而去卽其日也馬生謂我不能有青山三兒中  
子潤卽當發遂登舟抵寒山至楓橋舟阻遂往

虎丘自治坊塢而行一水沿回疎林明月佳興  
勃勃更餘至虎丘登千人石坐良久有袖低昂  
而過者道之擬其似來夢得指顧間時道反褁  
幅巾忽聞其人呼白巾者非來生耶道之驚認  
呼余因與俱前余倉皇不知誰何道之云此沈  
子德也余大驚異訊子德知從天池打七且爲  
細談七中光景時殘雪一帶未消明月相映欲  
與道之同賦明月照積雪題未成山僧進茶數  
甌夜半宿舟中是日少溫頗宜夜坐

十七早到禪堂老僧天際爲堂主建六時功課  
徒衆常數十人際曾親近遍容老人爲言容川  
人俗姓鮮氏曾爲諸生三十出家生平看華嚴  
得力嘗爲一貴人羅織下司寇獄對主者不屈  
曰好個禪堂鐵繩自斷易之復斷獄吏伏地求  
懺容曰汝等賣法在獄百日趙大洲先生請而  
出之余癸未春與同館諸君子相見於千佛寺  
率二子拜之蓋菩薩人也容以甲申年遷化際  
公篤實人願力甚普初徐文卿畱際住虎丘倡

快雪堂集 卷之四十九  
衆每月助銀二兩米五石不及接衆際所居常  
數十人而不聞之絕蓋緣在龍天不可以凡情  
測量也際曾燃一指際言禪厨鐵鍋小欲易大  
者價當二金余遂捨之欲憩息於梅花樓謁主  
僧郊溪不在晤其師雲住樓爲陸元齋所假假  
藏雲閣

十八乳林別去之錫山約二十二日晤於構李  
禮宋虎丘隆公塔隆嗣負悟徑山親弟也塔在  
梅花樓左乳林云卽空谷隆日本人日本禮爲

初祖老僧云塔堂中爲虎丘隆上字某塔堂左  
爲空谷隆上字景國初人日本使臣禮之作詩  
云吾師原是虎丘隆不肖兒孫住海東遙隔星  
河一天月今朝誰復繼宗風有空谷集尚術尚  
理二篇行於世板在吾郡之精嚴僧舍壁間有  
世尊歷年瑞像石刻甚精記文小字學顏之麻  
姑壇亦甚妍妙元豐間勒石又有大悲像石刻  
僧子英作偈去數武黑處有武夷居士王軒贈  
英公七言律俱宋物也粥後返藏雲閣作長安

快雪堂集 卷之四十九  
書四函敬承用輜雲衢三館兄朱雪樵居士又  
作石郡公趙明府二書俱付沈認卿下午棄大  
船詣寒山寺管登之先生來同宿登之以冷語  
解見示三更始寢

十九將爲天池之行適朱淨峰頭陀自山中至  
朱江陰人從學藍峰無爲教師也棄家住天池  
包山亦護天池者管先生許其人稍解佛法云  
早飯別管先生朱居士遂同來道之沈伯宏鷓  
兒行過謝宴嶺賀九嶺廿餘里達天池曉東上

入出迎堂中首僧也東燕之臨清州人牛山者  
宿牛山煉磨規繩始於版獨空規繩最巖者稱  
龜背石揚箒漫唐家坪其龍王最靈初現最大  
身開山祖師唐自在呵之但許化七寸身道場  
中常見之是夜與曉東道之三人談遂至夜半  
同遊朱頭陀靜室山左不二里其山居巖洞嶮  
呀小室三間瞰石中尤可愛徘徊不能去道之  
題月日數字微陰

三十早陰雨遺數字問黃貞甫得其報候老致

蘭數本今年分歲添驥兒婦潤朗亦佳事也憶  
戊子分歲命兒持酒壽樟亭太公今此老遂爲  
古人矣

快雪堂日記卷之五十

秀水馮夢禎開之著

庚寅

正月初三日辰巳間見日色尚爲雲氣所雜未  
能湛然同年黃端甫使來黃名正色時以御史  
按廣東夜雨校完東坡集四十卷擇鷓兒娶婦  
日用八月二十四日癸巳丑時

初七日雨繆當時以公車言求正岳父以盆中  
小梅索詩詩成

初十日早起謁蔡念所憲長郭青螺大叅訪殷  
二守慰藉良久殷亦灑然無大欣戚自人日至  
此日俱寒二更聞風聲

十一日早雪花飛墮飢後而止迎劉雪泉看內  
人幸不用白朮仲淳所戒者完殊勝寺飯僧田  
碑記陳母壽頌心抑太夫人下午赴胡郡公席  
席在吳氏莊語次知比部郎吳正志上疏攻李  
陳者卽安節乃郎吳秉忠也安節可謂有子矣  
郡公有疏草許借觀坐客有虞長孺坐中言蓮

池南山二老爲此中名德今夜見月婦病漸差  
十二日早陰晚雨同申甫道之往市上看書持  
葉肆香山詩集野客叢書而歸從胡郡公索得  
諸君子奏牘讀之見張見冲論皇木及彈徐太  
僕史給舍孟麟論李春開等吳比部正志論李  
春開陳與郊雜評事于仁上酒色財氣四箴語  
侵今上甚急讀之汗背其詳別記夜雪

十三日早尚雪屋上踰寸已而漸消婦病差能  
起薛伯起來顧常甫來以字說付之成暮雪詩

快雪堂集 卷之五十一  
相國寺僧悟性因杜生來謝留薛生飯遂留看  
上燈看上燈八人以梅花一枝行酒道之兩兒

岳父與馬夜雪

十五日爲陸臺翁七十作臺山頌作楊公亮屠  
長卿二書薛伯起周申甫來夜同步觀燈遇雪  
至官巷而別余至弼教坊先歸來道之同兩兒  
後夜雪

十七日雨包心韋拉晤湖上楊澹所作主二更  
而散龍王堂後軒復作一月臺用木作一棹楔

甚爲蛇蛇頗殺風景吳桂軒來

其心本非對

十八日冒雨邀包心韋看梅花相待于錢唐門

岳父留飯于金沙灘道之同行驥兒從楊澹所  
至金沙灘以他席別去西山梅花何園最盛雪  
作而行旣至僧出應門隔水數十樹開者未半  
道之與包心韋推拳道之戒酒負則以餅易酒  
連噉三餅餅惡良苦岳父自何園回入天竺日  
已將暮雪愈繁溪流甚壯偶得句云漲添初夜  
雪聲落萬重雲道之得句云暮雨壯溪流至長



生房已昏黑僧徒出迎方就坐雨止  
二十一日甲子陰午前頻見日色帥惟審贈七言  
古一篇汪堯卿刻兩漢雜集二十種欲題總名  
余題曰兩漢叢書甲子遇單日爲雄偶日爲雌  
得雄甲陰陽占俱驗夜一更聞細雨聲徹夜雨  
瞥上生癘五六日矣尚未愈作癢成西山看梅  
記

二十三薄暮索曾氏類說於太公書房箱篋俱  
索到竟無有此書亦不甚佳惜其抄本非板行  
物內有東坡仇池筆記甚可惜也當多方索之  
夜忽聞風聲雨徹明不絕看沈太公去歲日記  
自正月初一至十月十七絕筆就寢時夜半矣  
二十七早有霜穀雨斷霜清明斷雪從婦翁龍  
居塢展墓并看法華山梅花與來道之驥子同  
行由昭慶後門覓路至松毛塢田畦桑徑頗有  
野趣松毛塢買小舟一葉行十五六里登陸一  
路看梅花聽溪流小憩三方廟三四年前曾至  
此其小童已成沙彌能呼茶留客矣廟之四周

梅花最盛凡行陸二三里至龍居塢中復迷路  
至一澗邊坐石橋聽溪聲絕勝入塢梅花少減  
溪聲如故拜沈太公墓飯於蔣老居而出余所  
有二莊梅園數十樹臨潺湲甚堪卜築遂同道  
之驥子步至西溪宿白雲流水麟上人房

二月初一早雨將午而晴同出自西溪至芳井  
梅花甚繁不止十里

初六鶴林上人來商略法門數事見達觀師東  
塔舍利放光文凌元孚兄弟招遊吳山日中赴

之客許令慈妻子幹莊居對大江下臨萬井屋  
瓦間尚有積雪越山歷歷在望既飯遊三茅尋  
支徑至雲居中間松杉甚密徘徊久之松聲隱  
隱如琴瑟其處舊有松樂亭今廢至雲居看明  
心上人人甚少掩關寫華嚴滿於今年之四  
月八憇于雲居房小僧名寧靜號潛吾者出陪  
其房有老僧畜趙松雪楷書中峰淨土詩五十  
餘首此日偶出薄暮寺門望西湖落日徘徊松  
林一酌而別夜浴今日分雪霽自三茅至雲居

晚眺二題晴月甚佳日夕雲霧自二三其行  
初十晴有風間晦黃貞父吳伯霖如期來留飯  
鵝兒侍貞父力疾赴館禮氣未復扶而行  
十二晴此日爲百花生日晴宜果木諸花訪黃  
貞父且送其茗行已登舟矣白子佩學博來惠  
詩集及左中川詩集卽崆峒先生舅名國璣者  
白以崇德訓遷周府教授以舊歲乞休曾氏類  
說復得大奇事叩其故乃驥兒夢沈太公告之  
此書現在廚中汝父檢過不及詳耳更有許多  
話說早驥子告母因往物色一過且闔廚矣驥  
子親檢遂得此書異哉沈壻邀驥兒道之湖上  
觀新柳因與同行至斷橋沈壻兄弟董生善絲  
竹者已至遂乘小舟至第五橋步至第六橋岳  
王墓香車甚多徘徊久之返至大佛家中攢楹  
已至市白酒驩飲復坐斷橋觀暝色待月而返  
柳色視初九日稍穠矣自正月至今雞鳴非時  
者多次爲一家之主宜修省以禳之耳  
十六日晴氣微昏月暈得宋板文選是方十洲

家物上有太子太保傅文穆公收藏圖書

二十晴湖中落日甚赤風邀貢洪山胡奎菴遊  
湖湧金門登舟岳墳上岼遊天竺坐飲白雲堂  
再瞻 聖母所賜瑞蓮大士像 今上有贊歷  
中竺下竺三生石金沙灘登舟六橋至五橋步  
看桃花已開十分之一柳色更深風甚急自西  
冷至錢唐門而歸賓主甚驩得藏師兄五臺書  
及龍泉住山永慶書

二十四早陰午晴風請吳韞菴蔡念所二公已  
時登舟未時客至至龍王堂小坐堤上桃花已  
爛熳矣夜歸沈認卿至

二十六晴風田子藝來弔沈太公因約湖上游  
兩兒侍飯于寶雲超然閣子藝兩郎亦在至智  
果山居一逕最幽僻仰視寶雲羣石離離如魚  
貫出瑪瑙寺至岳墳至三橋飲于桃花之下今  
日士女最多子藝雖老興頗狂逸遇黃桂峰名  
應科中武狀元者一橋覓舟別子藝而返  
二十八晴風湖堤揚沙報謁孫世行約遊湖上

快雪堂集 卷之五  
戒治具至湧金忠烈祠世行已見待久矣小舟  
至四橋步至三橋乘小車至岳墳遇田子藝張  
仲初拉二人同步至四橋堤桃花佳處藉地飲  
良久又至毛氏書院竹陰之下張飲盡日自新  
堤至田寓一茶而別荅藏師兄書

三月初四清明早有開晴意隨陰晦大風薄暮  
晴夜見星月早作大堤桃柳詩三首

初八雨張仲初餉鹿脯田子藝書來索長興友  
人書見和桃花片五言挽沈太公七言萬年寺

僧真秀號雪堂者以雲間徐孟孺吳江周季華  
書求見秀將檢藏求爲倡緣夜作桃花片詩一  
首作報田子藝書爲子藝作長興姚伯道叔度  
書姚有書奴駱僕美而能詩于徐茂吳齋中見  
其九秋詩復於張仲初扇上陽臺夢排律甚佳  
人言減晉叔爲其潤筆減殆不及也  
十五晴月色微昏夜檢舊書牘得沈太公沈茂  
仁諸手札不勝哀感

十八晴晚微陰二更月甚佳黃又玄來不相見

八年矣淵冲善下真如萬斛之舟留敘竟日驥  
兒侍

十九晴甚熱不勝夾衣張仲初餉龍井茶于中  
甫金不佞四人試茶至昭慶寺訪黃又玄遇西  
溪桂峰比丘方丈僧留茶坐甚久陪客始至初  
更別

二十早細雨日出暖稱病不出連日冗冗幾無  
生人之樂今日稍暇而亦不能無事何時掉臂  
入山以避塵俗乎

二十三雨春第二甲子徹夜雨早拜節推吳君  
名烟華亭人庚辰會榜己丑廷試舊姓田曾識  
之青浦縣齋中周申甫來

二十四午前有微雨拜劉肖華暫憇宗陽宮道  
者云老君殿後土山上有趙子昂碑

二十五陰雨微夜寒看虞長孺餘杭未歸看徐  
茂吳目疾案頭閱江陰朱氏所刻阮集詠懷四  
言十三首詩紀但有三首乃知六朝詩散失者  
多矣

二十七雨午前大後微寒校定阮嗣宗詩增錄  
江陰本四言十首午後同細君烹龍井茶惠泉  
二罈茂吳許借用

三十早雨陰晚晴許然明自山東回同張仲初  
來畱敘烹惠泉龍井楊仲堅來餉父詩集求序  
四月初一晴吳氏子持先人券見返名某其父  
名某住柴場灣約三十餘金有在嘉靖二十四  
年者其父能不言至死而其子貧以券相返能  
不爲之報乎

初五陰雨薄暮見日色夜坐復聞雨聲附少林  
僧宗遠書金字華嚴引作帥惟審送行詩噉葷  
菜魏典史所送

初六雨夜始不聞雨聲稍寒作潘去華報書貯  
天落水烹茶天落水雖不及梅水亦堪烹茶夜  
讀送賦

初八晴鄉同年李龍渠來留飯李談東海補陀  
之勝甚具且知金堂諸山可以開屯養兵李蓋  
有心於天下者

恆聖堂集 卷之五  
十七晴期盧思仁遊勝果姜子幹同行聞茗上  
諸君并其子弟俱言至此就余談舉子業日中  
到勝果老僧出迎余不至寺二年矣小憩樓下  
良久思仁至同登越王臺三松頂看省城來龍  
復返勝果吳伯霖至同飲甚驩共步至報國而  
別

五月初十晴風飲胡郡公於湖中楊公亮盧思  
仁陪先至湖心亭後至龍王堂以風大回舟頗  
艱郡公自堤上別去楊盧隨亦別舟至錢唐門  
步歸

十二自五更雨抵暮不歇俗謂雨打梅頭一去  
不回頭今日入梅不宜雨去歲得雨兼雷果旱  
此日無雷且係壬子日俗謂壬子癸丑甲寅晴  
四十五日滿天星壬子日雨又久雨之兆書以  
俟之

十六早有微雨漸晴楊公亮來沈箕仲書至日  
中赴楊仲堅湖上之約同范光父自錢唐門至  
淨慈同登居然亭自西泠斷橋而歸水光月色



相映佳甚

二十早微雨數點下午大雨一二陣大熱雷今日俗傳分龍不宜雨雨卽旱甚危之

二十九雨至普寧寺訪葦航講師此寺戴道人僧碧峰所營修賴余持護欣余一到許之久矣今始涉之送吳韞老至雷電而別夜過許儆翁弔其父之喪

三十早至金鵞謁祖母之殯同申父冒雨看山正結甚佳許儆老遣使來迎是日爲儆老留晤其諸弟儆老十年前似儒門立幟此日議論頗以生歿爲急一變至道甚可敬也

六月初三晴午後雨俄大雨諺云六月初三一箇陣上晝耘苗下晝因此有秋之徵也

初七晴午前涼雨一陣盧楊二兄過敘至暮別去胡生廷試來謁胡此中名士年諭四十爲李學使所黜亦數奇矣

十三早霞晴熱聞楊澹所之訃揚以正月別于雪中至京以五月十三日卒傷哉

快雪堂集 卷之五  
二十晴稍有風五更起往范村量地歸途至虎  
跑憇之主僧明清號月泉具蔬菜打餅四翔泉  
側看性空遺事碑及東坡先生詩刻頗有閒適  
之意  
二十二晴熱晤盧志仁乃知姜瑞宇至非江念  
所也楊公亮酒中爲一妄庸孝廉呼叱公亮能  
容之比見公亮略不知也此是公亮討便宜處  
食笑覺佳連日飽食蓮子

七月十五晴夜宿白蓮寺傍月甚妙姚羅浮來  
譚敘契闊甚久致盛叔永候滑縣書

八月初八夜微雨而雷今日白露忌雨或云夜  
不忌二更雨更甚早介山東禪僧如心來心乞  
東禪寺碑文宿諾數年余亦忘之矣

三十早雨午後晴泝梅溪山水甚佳作別傳老  
人傳二更至梅溪鎮泊舟

九月初四晴早行下午至檣李北門復源上人  
別去附達觀老人書于中南書宿舟中

初七晴出門已前卽病目戴升之索包襲明所

傳陳仲淳一方見授當歸一錢防風一錢黃連  
一錢朴硝一錢明礬五分銅青五分杏仁十六  
粒去皮尖郁李仁四十九粒去皮尖已上藥用  
絹包投入湯中煎數滾置地上稍出火氣連洗  
四五次立愈試之自初五晚至初七早可視書  
卷見燈火矣校蘇文數葉

初八晴湖中諸山俱有烟霧發孫子貽書如龍  
并驥兒從是日驥兒瘡又發夜蓋綿被

初九晴微有霧兩關使者治酒將就此地登高  
當避之挾驥兒同申甫泛湖而歸姚善長來姚  
乃弔沈太公甲戌京師相處故也夜同善長談  
敘幾至夜分

十一陰間有微雨夜疎雨連日天氣頗溫夜大  
雨徹明朱養淳來得鄒爾瞻書託葉蕪湖所寄  
十三午後晴此日寂宜晴呂氏妝奩至押奩八  
人雜家人并脚夫約三百人用費三十金貧家  
當此門戶良苦乃知對親決宜擇貧家爲稱也  
十五陰雨夜開晴見月無端失去山谷集爲之

一怒得田子藝書返其路史二本

十八陰日間出夜晴見星越諸生孫如湛來彙刻時賢宦中稿索序并索余未刻時文孫爲文融之從子能文有時名自八月下旬患目疾至今時愈時發未能脫然許儆菴先生書來市巾得五色錄一冊乃宋以前人採摭奇語奇事充詩文料者

十九陰雨夜半後晴酉特新人至門成婚禮呂大舅送杭俗婚禮視吾郡大異大都可笑諸親陪飲拂塵酒二更而散

二十一晴和夜微有霧氣新婦三朝適上見禮見新婦于祠堂家中男婦見新婦呂宅送點茶二十四榼款呂舅於湖中湖上木芙蓉盛開矣二十五晴張鎮泉來付還文談二本閱報九月初萬和甫上疏論首揆語甚切直止於降一級調外甚可慶也

二十七晴岳翁芝暘六十稱觴宴客更餘而散蓮池上人遣期明日之晤胡生廷試來

二十八晴湖上訪雪浪法師晤明宗宗檢藏於  
靈芝寺過中於歸元山主所晤蓮池老人於上  
方會介山講師來同步至巷口而別唐季泉等  
宴壽岳翁拔余作陪撥弋陽戲夜半而散疲苦  
之極因思長卿乃好此聲嗜痴之癖殆不可解  
十月初二晴此日甚閒本如同大東佛會首來  
金不佞見示東坡戴笠圖貌頗似余迎仇先生  
閱報萬和甫以九月十四補劍州判矣  
初四晴夜寒適得黃貞父書遲余山中飯後赴

之寓於岫巉山房留宿同步至韜光看白樂天  
與韜光倡和詩碑夜寺僧松隱作主與小師蓉  
江俱大醉

初五早陰午晴晚復陰同貞父訪邵虎菴而別  
邵居巖谷頗勝邵名穆生抑菴伐九里松曾作  
泣松謠虞長孺等紀之至昭慶鶴兒已久待遂  
同往拜楊仲堅主人設茶以待早間山房墮一  
殘齒

初七晴奠周母王太夫人申甫設席相款許然

明在坐酒散同訪呂道者道者能聞聲而知吉凶月甚佳

初八細雨彌日不止內人赴唐姨湖中之召呂師來言余前身爲苦行頭陀以符藥起驥兒疾爲福嚴僧題疏天台萬年真秀作唐元徵管登之二書

十一晴夜半起送周親母之殯至周莊飯而別同黃貞甫楊仲堅凌元孚兄弟輩七八人新堤一行時黃菊盛開長堤如繡菊中藏一雉入水爲漁人所得仲堅易之以歸約翮健卽縱之此今日奇事堤上又與婦車相值歸家方日中耳得潘去華書田子藝書明宗上人同京口僧如學來得藏兄雪浪書下半日甚忙告家中明日絕糧婦甚愁余誦老杜失學從兒懶常貧任婦愁之句以自嘲

十二辰巳間微雨竟至夜不止五更雨聲甚厲臨安簿唐良臣來出其子大章文三首求教唐豐城人向曾一見亦卑官中有識知者爲沈方

平吳養之來顏叔作刻文序跋唐元徵藏經閣  
碑記

十八陰雨午後不雨微寒夜不雨而陰同仇先  
生周申甫金不佞兩兒赴許冲愚之召于湖中  
周娘來故曹太史妓嫁馬生而不終年暮矣而  
繞梁之聲尚在白首風塵甚可念也

十九晴西風請許冲愚湯孟韜爲天竺靈隱之  
遊岳翁周申甫陪昨雨後泉聲甚壯落葉滿途  
真佳觀也觸黑而還申甫靜寄軒聽周娘揭調

看柳中明月

二十二晴早霧晝有雲氣薄暮細雨更初大雨  
黃貞父自山陰回道龍伯貞海上事大可駭異  
當問明記之

二十五晴西北風寒舟行甚逆日落甚赤至塘  
西覓小舟看馬鞍山地遇周夢醒其人好外事  
丁丑春相遇京師夜宿新步酌村酒數杯醺然  
而臥

二十九雨茅公良設席舟中送至涵山中峩陪

快雪堂集 卷之五  
夜宿新步是夜與貞甫飲甚有興聞隣舟笛  
十一月初五陰雨不寒半夜雨徹明辰刻至郡  
同程生看祖塋取龍虎相交過脉清細嫌龍首  
稍寒當營田社許作屋種樹以補之帶晉書宋  
書舟中查錄尺牘過沈家香船

十二早有開晴意經日不雨登舟到惠山顧氏  
莊良久而友玉至同登惠心小閣遊黃九山

園庚辰歲曾係五湖舟于此園丁彷彿記憶憇  
流觴曲水閣中兩面見山大有佳致報李汝培  
至喜遲之至薄暮同萬涵臺來迎之舟中過顧  
氏舟同衆四鼓而別李汝培又過我舟同萬涵  
臺談癸未別後事甚詳

十七雨至明順風揚帆百里至義興在汝培舟  
行三十里成贈汝培詩卜讓卿從軍曲四絕  
十九有開晴意時見雪片夜有細雨至明飛雪  
吳之矩早見存舟中遂拉爲城外之游飯于之  
矩莊居看孫老所擬陽基大不通南山雪色真  
可觀泊舟南門外之矩相陪至一更入城明晨



快雪堂集 卷之五 十一  
定意爲國山之行矣但未卜天意何如

二十一早飛雪陰晴之間吳之矩送至中溪而別又行十餘里遇繆仲淳自毘陵相迎作送李汝培詩夜至毘陵于中甫以昨日還金壇

二十二早雪比昨稍厚行二十七里別汝培讓卿甚覺依依夜至蔣墅賀澹翁來見顧舟中諸郎同至者三人因然明遂談令莆田時倭變事甚詳頗爲傾聽二更謁主人設晚具宿之齋中寢時四更矣

二十四大晴西北風于見素自丹陽歸相見於城外同舟入城諸郎至舟中相見登見素公之堂同中南潤甫遊灞上池亭中午後訪達觀師于顧龍山以寫經將畢約明日午後相見

二十五晴午後肩輿往竹園謁達觀師遇之途次同往池亭談至三更復宿舟中

二十六晴冬至微雲拜聖節于亭中禮佛出觀音像同老師禮拜粥後入城荅拜令君賀知忍執弟子禮主人設席

懷雲堂集 卷之五  
二十七陰晴賀知敏率弟子姪四人拜從王方麓先生來

二十九陰晴早至竹園謁達觀師師寫經於此名其亭曰墨光亭同師仲淳過王氏墨香菴王氏叔姪爲師書經築室時正落成是日會王生伯高孫生仲來孫執弟子禮達觀師初不果毘陵之約屬擇日書經得初六因再果前約

十二月初五陰早至惠山遇周叔宗季華甚奇之乃送長干姬楊舜華至此楊從梅生蕃祚出遊將三月矣遣人謝二顧漢凌追至山中遂同楊姬周梅登錫山之巔夜梅生作主敘叔宗舟中夜半漢凌見強入城就宿時雞再鳴矣

初六陰將暮而雨遂達明敘叔宗舟中甚歡雞鳴梅生強楊姬過船遂別與二周約待之寒山寺中

初九晴夜寒月甚佳早得北信叔宗季華且至別之明早梅季豹至惠山追覓我舟不得是夜飲達曙梅生醋意楊生大哭而別恨不及見之

午後二周始至陳公衡來與二周同敘季豹寄  
集至古詩甚善江南第一手也

初十晴月大佳二周許然明往見公衡移船虎  
丘旭上人餉菜一甕茶一觔至禪堂看天際剡  
溪住持頗能爲法門盡力中甫作文美之飲於  
剡溪梅花樓前晚色甚佳報二周然明至迎之  
石場坐語良久至叔宗舟中飲沾醉復同叔宗  
至石場看月

十一晴甚月大佳宴起然明早登山粥而上遇  
之衛武陵店中施金一兩完鑄釜事剡溪附往  
三茅閣觀小樓晤曹氏主人名申錫字周翰孝  
廉之子甲申歲同袁了凡晤其人且蒙款惠余  
俱忘之矣曹生欣然見留且盛稱吳妓薛五之  
佳與渠甚厚而失驪近日詳言其故設計邀之  
假吾楊奴以去余往就徐太僕之約

十二晴月甚佳早至虎丘曹周翰具酒舟中相  
款坐有歌伎王順夜看月石上王生歌又有善  
簫者吳生偶然相遇夜分別曹生薛姬歸舟放

至上新橋

十四陰夜月甚佳范長倩徐大來至舟中索去  
晨粥粥竟報長興丁長孺至既相見爲長孺復  
留半日長孺長倩送至閶門至葑門已黃昏矣  
初更陳公衡具酒舟中相迎復拉余宗漢來相  
晤甚驩是夜陳令當往護月三更別去宗漢復  
留余舟數日約晤武林

十六陰西風下午微雪飄洒管先生見訪舟  
中城門壅良久始得出順風頃刻抵吳江於

叔宗宅晤新安丁南羽吳康虞蘇四水程孺文  
四水舊識余

十七陰訪季華復至其兄九山宅聽其奴子吹  
笛聲甚激烈

二十一晴早微陰步往三塔禪堂項于王已久  
待君實後來馮鑒之戴升之來嚴蓋夫治具李  
戴馮項四生送至十五里外諸生大有飲興甚  
惜其別夜宿陡門今日聞周純甫之訃卒於此  
月之初九日大爲傷恨墮淚者再

二十二後夜有雷一聲雨三陣天明陰霧細雨  
有聲僕輩報半夜雷雨余實不知也初更舟至  
長安鎮上河竟無舟以監兌使者取道故亦從  
來希有事也風雨蕭蕭意思甚爲索莫

二十五雨輕霰終日周申甫來得純甫返三國  
志書尚欲索二冊豈意遂爲異世耶爲之哀酸  
陳季象來得屠長卿書

二十九晴霜午後陰晦夜微雨閱報初十日

旨遣廷臣四人兼憲職分閱邊關曾于健周元  
孚與馬鄒爾瞻攻南京禮部門生胡三省報除  
補遂平縣杜華先調山西僉事聞蘇君禹至索  
肩輿訪之面訂守歲之約夜享先高祖已下像  
家宴二更君禹至見二子飲至夜半客寢守歲  
而有萬里之客亦奇事也

快雪堂日記卷之五十一  
秀水馮夢禎開之著

辛卯

正月初二寄候陳肅翁老師胡郡公招陪君禹  
舟至三橋龍王堂坐至更餘而別與郡公同舟  
至湧金而返嘗聞味有柔魚如蒲絲而美

初七五更風雨霰雪驟至如萬馬騰躍之狀

初八陰晴北風寒甚一冬所無大晴登成山四  
山積雪甚佳告先人墓以遷葬之役得陳公衡

報書介山事已安妥涂郡實原之也  
初十訪徐茂吳畱叙至初更而歸見餉芥茶一  
瓶許明日看春之約  
十七早有雲氣下午風雨至夜不歇半夜止沈  
生紹元紹祥潘生懋勳執贄稱弟子夜月朱伯  
潤諸子飲於燈下蘇君禹寄到長安志碑刻若  
干紙

二十七陰晴春甲子晴僧性善海印持張梅村  
書索刻經銀并乞血書大藏經疏文又爲無門  
洞僧湛如乞詩

二十八晴三日甚寒重裘以居語溪吳生尚倫  
倪生師臯拜從看文

二十九晴稍和孫上池引呂道徵李真甫來拜  
從李名尚志呂名居恭名士也

二月十一拙園住半日甚清寂可喜錢湛如自  
漣水過此梅花下數語而別薄暮周敬所忽至  
以其子新入學相見且移榼見俗人談俗事頗  
爲敗意許冲愚遺舟相迎自武林至此夜宿舟

焚香開卷神情小舒

十一晴東南風月甚往五更發棹薄暮至吳江周叔宗陪趙令看梅花待之久未歸此日看完楊升菴卮言六卷焚香讀書終日亦改歲所未有也二更叔宗來

十三晴東南風下午益大有雲氣落日露一點甚赤初更雨趙令見顧於叔宗齋中期晚酌沈認卿喪父弔之認卿兄弟五人仞卿最少得樂子晉書訪沈少卿叔宗陪往談叙甚久過叔宗

中田廬精舍數間佳甚尤宜避暑欲倣其意作數間湖上亦一快也至趙明府舟沈少卿及主人已見待良久舟泊長橋坐至二更盡而別又作數書別叔宗就臥已四鼓矣時風雨正發十四風雨輕霰舟行甚苦半日僅十數里不如不開船赴沈少卿約爲佳耳日中開晴風逆如故至石湖而夜舟人請前食鱸甚美惜不能與阿祥共之甚寒如嚴冬月甚佳十五晴午後風月甚佳恨風大耳日中至東山



弔許氏冲愚相款遊墓釐峰西山及吳中長興  
諸峰一覽而盡惜風大不堪久望耳諸客俱望  
洋而返相從者二客歸途踞石橋看梅浮白甚  
樂夜飲清吹可聽飲十餘斗宿船中

十七同嚴汪陶滕四君踰山看王文恪公祖塋  
自前山道法海寺而還寺僧翠巖進茶甚香美  
十八晴風日甚美月亦佳早同諸君遊武山初  
登者爲西金山山西金而南爲武山其顛名鷓鴣  
墩王文恪改爲錦鳩峰峰左爲壽寧菴僧悟聲

能書其師祖洞然云能詩錦鳩之左爲射嶧山  
右爲叻山實墓釐正幹之盡也田甚腴俗甚厚  
大堪卜居輕舟至俞塢興福寺許氏設酒相款  
作戲玉簪陳妙常甚佳湯孝廉諸君俱宿舟中  
付銀二兩寺僧石湖買蜜東山出蜜最佳冬間  
蜂食款冬花釀蜜爲尤佳春月似不及矣

二十李玄白來徐長源執弟子禮徐昇遠來名  
應雷相會京師時秋祀山陵徐爲韓侍郎客吳  
之矩李玄白推舉其人此日看徐武功手卷及

快雪堂集 卷之五十一  
諸名人手跡樂甚具入此目香衲在四下谷  
二十八早客來甚多同李君實訪包心韋親家  
同過東塔禪堂訪介山法主看山茶此元時物  
矣屋亦同時所蓋扁曰天花境余易境爲室遇  
李見亭太史乃郎云金汁灌花將死可復活造  
金汁法乾人矢佇之甕中入地三年遂爲清汁  
可用矣愈久愈妙李生萬金之家今蕭然貧矣  
三月初一到楞嚴訪沈純甫先生於綠蘿莊夜  
李君實始至夜半行遂往武林

初二早至家王季常昨暮至同王季常李君實  
金不佞沈婿仲孫兩兒出錢塘門渡湖看六橋  
桃花晤田子秬先生遂成勝集子秬步履蹇澁  
行止須人比昨歲大衰矣仍以二婢金錢三春  
隨

初十陰雨許然明張仲初來仲初餉新龍井一  
包試惠泉旣去而姜子幹至手裝兩兒課程文  
稿簿子六本

十六晴日中風雨甚驟復晴月色甚佳一春所

無六部日中風雨甚烈  
二十四見日帶陰夜微雨余宗漢來名翔閩人  
故全椒令以能詩遊江湖屠長卿來留共飯陪  
貢運長主人七位馮南臺爲首席設南臺家庭  
中牡丹盛開一種紫色者佳

二十七早微雨陰日中大晴暖曹林師兄來相  
別在巳丑十月今兩見春色矣留之齋中酌宗  
漢長卿王槐庭蔡穉含於湖中同集者楊漢卿  
陳季象黃白仲錢叔達徐茂吳許然明賓主共  
十一人期而不至者田子藝罵席者呂永山是  
日新晴湖山甚妙絲竹清歌助之頗劇驩洽

二十八晴陰熱不能勝袂甲子與曹林師兄行  
出湧金茂吳已先往至老龍井相及茂吳與閩  
人莊生者俱得茶數斤以不持臥具別去余與  
林兄宿龍井

閏三月初二早往崇福菴訪葦航法師楊抑亭  
居士留齋

初四曹林師兄東行完齋僧田碑文得婁東王

逸季秀才書

十三晴月甚佳焚香開卷窮靜退之樂一春中  
一日而已閱南村輟耕錄因抄補七紙手裝并  
爲四帙宿石門

二十晴溫午前到蘇州泊舟葑門內徐少溥園  
邊良久挺菴至以其二弟及乃郎相見同遊少  
溥園山池甚美舊爲天師莊後屬吳原博先生  
再易主矣

二十一晴風早至虎丘晤曹周翰招劉生侑酒  
二十二晴風熱曹周翰挾劉姬見訪初夜陳公  
衡談至二更別去陳令極感管登之屬爲致謝  
二十六晴罔伯兄弟具飯相邀飯後罔伯召仙  
乃得靈鬼月蘭朝譚甚有意許僕吳門當有所  
遇且妙始記以俟之閨門遇曹周翰陳箕仲周  
翰人事頗煩必欲相畱停舟山塘以劉姬陪  
二十八陰下午風甚驟晚晴移船至寒山汪子  
建移船作主坐客惟文仲賓主四人而已船行  
不里許望西山諸峰亦自不惡回舟至鳳山橋

快雪堂集 卷之五十一  
遇曹周翰以舟相迎夜宿寒山水次醉

二十九晴粥于寒山乘小舟行遇賀知認同載  
遂至冶坊浜及大舟曹周翰席設普福寺白家  
女戲甚佳坐客有姜子璠閒仲俱名士也夜泊  
舟半塘

六月初九晴熱日西有虹微雨數點連宵月甚  
佳內人大女看荷花於湖上朱支中自吳中來  
朱生持所作一題七義見示甚佳一時吳中當  
無出其上反不得入闡衡文者近無目矣

十一晴熱伯霖作主早謁南山上人上人修淨  
業於徐家菴影不出山十六年丁亥歲爲他緣  
所逼出山一月自此禁足又四五年矣此本色  
住山人也看伯霖於邵莊南山上人留齋歸飯  
山房晚出庭中見火雲滿天明日之熱可知也  
夜甚熱

十三陰微雨數點稍涼夜有微雨顧子敬程萬  
里錢叔達來錢生以貧求助甚切安得人人急  
之亦癡矣夜涼如秋

快雪堂集 卷之五十一  
十六晴山脚微有煙霧文仲早起作提學使者  
書爲荐二李生也此舉可謂高誼文仲粥而別  
報屠長卿不至訪周中甫中甫讀書處白蓮洲  
陳氏樓居四牕玲瓏惜面西耳宿陳氏樓晤翁  
孝廉夜小舟泛月  
三十天未明雨夜稍涼中菴上人來交付藏經  
送至楞嚴堂中頗清曠李玄白來報君實朱伯  
潤共此良夜焚香啜茶大是清樂玄白伯潤宿  
水閣日中沈茂仁使去自京回得陸敬承余雲  
衢陳伯符楊貞復四書吳伯度來

快雪堂日記卷之五十一

快雪堂日記卷之五十二

秀水馮夢禎開之著

癸巳

四月初一早謁先聖祠行釋菜禮從鄒爾瞻朱汝虞王後暘鷄鳴山眺望落日

初二五更聞雨聲東堂點題同鄉錢穀趙學仕設席南門外王氏園作客沈光祿桐朱汝虞與余三人園中牡丹甚盛

初三會講見陳伯符救趙考功侵輔臣疏

初六覆講定初二日堂課一等張金礪等二十四名

初七入監背書李維禮治酒高座寺相款約陳公衡陪遂步登雨花臺丙子秋同李伯遠方五遊今十八年矣又至普德寺入路松徑甚佳

初九陰雨中鄒爾瞻至談對竟日講院會課出題

十一同汝虞訪張端叔坐中丞公署書室廣庭見月升且中掩映庭樹三人語心道故中丞出寒具北麪所作勇噉甚快

十三早雷雨漸晴熱僅勝單衣夜半後大雷雨迄明鄒爾瞻兄過辭將歸豫章小坐深言離色相照

十五夜月甚佳看十二日堂課姚宗宸爲首

十六晴二更雨一陣講院補考諸生三十一名出題經書論策四篇

十七陰雨到廂看卷定朱之蕃等一等十名訪爾瞻同酌于汝虞宅同談長安舊事疊疊大堪



捧腹同酒于武真宮同宿是夜驚夢覺豐大樹  
十九晴刻南雍課業一卷至八卷完工送鄒爾  
瞻兄于江干皓然潔素將母而旋如鷓鳳脫青  
靈而去今日見千古廉頑立懦氣色不懷私人  
之懷耳設餞舟中同張端叔朱汝虞

二十陰晴微見日亦微見雨賀知認吳成志來  
讀爾瞻扎如冷風入于煩襟也

二十二陰漸開晴同汝虞移榼訪少宰鄧公清  
言竟日

二十四晴帥比部機至夜繆仲淳譚公亮至雷  
齋中小叙

五月初一先聖祠行釋菜禮下廂看二十七日  
會課取一等張金礪等二十七名接姚伯道紹  
叔度扎各餉夏前廟後芥茶

初二五更雨晴熱落日甚赤焙芥茶入罈得宋  
榻高宗臨二王帖

初三入監視事會講拜鄧太夫人壽宗伯賢母  
也

初五早雨熱漸陰晴且微雨得李思訓長江六月圖卷同周甲甫二三友生一鑑亭小叙

初七陰雨稍寒可勝單袷入監入視開假背書揚止菴相見卽著六書總要者接鄒爾瞻兩札看初二日課一等十六名汪以徵爲首坐一鑑亭觀新荷荷葉上雨聲甚佳

初八陰雨涼入監視事點校北史諸生夏之時等十二名丁生紹軾來謁此佳士惜已撥歷畱語數畧

初十四鼓上孝陵黎明行禮看初九日講院課定夏之時爲首張金礪次之

十一入監視事覆講議復流水單鷄鳴寺餞溫太宰同張端叔朱汝虞

十三招帥惟審賞新荷一鑑亭月上移席芙蓉亭孫子桑同

十六看課一鑑亭後剪芭蕉煩葉噉苧頭北麵不托甚快

十七陰雨放夏至假十八至二十七日林丙卿

尚旻來畱叙終日移一鑑亭後桂樹西北隅爲  
李玄白致書孟蓮渚先生

十八陰微雨晚晴初點梁史

十九微陰章侍御談江都鹽城水利吳君著五  
經旁註見示尚書數處與舊不同亦有理

二十陰雷雨俗傳分龍日雨當夏旱面鄧少宰  
送鄧太夫人贐畱吳季倫一鑑亭小叙

二十二齋宿刪君子亭前竹

二十三晴晚涼雨一陣署中午後回私衙同年

蔡逢時過叙

二十四夏至晴風拜鄧定老餉藤枕一

二十六靜海寺餞別鄧定宇先生因同登東北  
師山岩洞小而奇飛來池之齊山兒孫也

二十七晴六月初一出表前三後三放假二十  
八日起驥兒文字大通始有家聲之寄矣池中

白蓮花見數蕊有將開之勢悔以吳姬歸連日  
杭姬構隙頗乖琴瑟之好

二十八晴涼得趙定宇先生扎支太綸扎招張

端叔一鑑亭賞新荷

六月初三陰雨中後一陣略暢微涼校宋書一

卷二卷荷開花六

初四晴午後風雨移君子亭竹十四株種一鑑

亭後

初六晴熱科跣不見客校宋書五卷

初八早雨漸晴薄暮沐髮小勞冒風夜嘔吐遂

病作棲霞圓通菴僧性通募五百人緣買齋僧

田疏

初九有陣無雨病噉粥載惠泉水三十罈至

十一午間微雨尚噉粥始食池中蓮子

十三早微雨薄暮雨看課定張金礪爲首

十四晴間微雨東堂點差撥歷周叔宗季華至

館之一鑑亭

十六陰雨午後雨稍大荷亭舉簾看雨同叔宗

兄弟

十七薄暮雨頗大入夜未歇得丁右武屠長卿

扎

十九陰晴間微雨看十二日外課定姚宗宸爲  
首焙芥茶得梅禹金季豹扎

二十一晴熱朱汝虞張端叔來了觀蓮舊盟汝  
虞先至不解衣晤對終日猶言無暑而余揮汗  
苦不可言人性不同如此

二十三薄暮雨急而大頗涼得顧升伯扎每憶  
虎丘相會時去住畱連夜半推蓬快語余此時  
便以宏詞人物許之今幾年矣入手惘然

二十六陰晴疎雨數陣陪楊止菴遊聖殿兩廡  
六堂各廳君子亭

二十七看二十二日課定夏之時爲首周季華  
病瘧一鑑亭五日矣

九月初一早陰雨漸晴謁先聖祠行釋菜禮分  
北史十二本陳廷策十二生校對夜賀知幾知  
認南羽季華張省菴會于一鑑亭

初三五更禮部送冬至表四品諸公以掌院班  
在上讓先余余以未辭謝乃如舊辭廟辭堂東  
堂公宴

初六晴上陵翰林院到任公宴公宴代席一兩五錢

初七晴吏部劄付署監事晨拜文廟

初八午後雷風雨國子監署監事到任謁先聖祠啟聖祠土地祠先下東堂次升堂次升廟

初九內人歸寧岳父余送至清涼門外

初十風大舟泊不果行余至下關黃貞甫至以送茅薦鄉北上畱夜叙

十三晴次秋甲子連宵月甚佳周季華辭歸

十六面試附例監生汪應錄賞之閱十二日課定鄭朝棟爲首

十七晤葉章舍于蓮花菴同陳公衡午後登山眺望

十八會同年兄弟于南門徐園樹石甚佳卽鳳凰臺故址也伍冲吾作主赴者五人

十九遊天界寺移樽半峰亭陳玉叔作記

二十更餘聞疎雨君子亭閱卷

二十一君子亭閱卷取一等堵奎臨等三十名

六館之士與考者三百餘人

二十五入監賞行優監生十名罰行劣者十六

名

二十七晨起忽見木杪峯頭日色甚麗俄而陰  
雨夜雨講院課士出題

二十八早雨陰晴收翰林院九月俸一兩七錢  
八分柴薪三兩六錢冬季柴薪連閏十三兩加  
耗

十月初二入監點題文憑至校北史帝紀一卷

蔣生應謹來佳士令與驥兒相見聞此生能口  
作應對手仍指揮而提筆不休有如風雨若此  
不減龐士元

初六早霧晴送元旦表得吳安節之規扎校北

史帝紀

初七日霧終日不散繳憑用印看初二日課取  
一等二十八名張懋德爲首

初八霧陰日中見日色晚微雨陸敬承牌至爲  
之色喜遣役迎之丹陽赴帥惟審席于劉園帥

子廷鎮侍

初十陰入監視士看講院課得李生憲可

十四早得陸敬承書昨莫宿句容此日當至午

後迎之玄貞觀方公宴張端叔至盡日歸汶上

張覺吾來釣石先生子

十五東堂倍大司成公宴移書藉于南院新衙

移檯看陸敬承月甚佳

十七晴寒月甚佳挈諸姬步月池上

二十移居南翰公署別敬承併見驥子

二十一晴寒午後滌淡徐南山質琴十金作管

東溟先生曹周翰扎

二十七晴為驥兒聘陳生廷策相資同沈觀頤

遊報恩寺爲了空修南藏作護晚同汝虞訪葉

選部元式

二十九晴溫夜微雨陳生廷策至館

十一月初二公私無一事甚可喜家眷至京口

當已三日而不至豈江行待風耶或返丹陽起

陸耶使人牽係不已早得瞿元立書云無念和



尚併袁太史王蟠之弟俱欲會僕待之則已往  
牛首矣今日看宋書一卷又看蘇長公札十數

紙

初四早霧晴袁生中道僧無念見訪談深畱飯  
而別蔣生應綬呂生拱文衷生廷輔彭生謨俱

集

初七晴寒夜無星訪袁生中學無念上人邀敬  
承鷺峯訪袁小脩談對半日

初八早雪晚晴聞陳繡計始的始伯符謗達觀

師吾疑當受報果有此可嘆

初九別敖嘉猷于河上

十三晴暖重試惠泉括檢茶具有不全者因憶  
還山此事安得曠廢爲之惋惜

十五晴土地祠行禮孔廳揖朱之蕃來朱汝虞

來

二十一晴堵奎臨來得吳之矩書李壺十

傷其三

二十四晴温婦翁辭歸俞二官馮寧同行得周  
叔宗季華書餉橘會文至者五人

二十六晴本日齋宿午後點齋直指聶君至晚  
作謝三相公啟

二十九晴冬至三更上陵同陸敬承朱汝虞至  
衙門換朝服詣禮部拜牌再回邸換衣小叙至  
明而散廳堂諸公來堵生奎臨王伯臯來畱飯  
閏十一月初二陰有欲雪之狀訪陸敬承不遇  
訪張端叔病畱噉餅朱汝虞復助二榼會諸同  
年俱至榼中有頻婆果余與張睿甫各懷其一  
余不嘗此果十年矣

初六晴夜半後雨諸生會文曹林師兄來

初七雨久晴而雨甚喜無事

初十晴候少司空邊公薄暮張睿甫邀看奕惟  
端叔與主人對奕坐良久而別

十六晴病目曹林索書發十書與之并借藏經  
展閱

二十三晴清涼寺送周海門同年六人俱在始  
登清涼臺卽臨春結綺故址有亭焉今亦不存  
矣余初獨登後又隨諸君登景陽寶井俗名煙

脂井今以石覆之僧房在竹林中頗靜歸途拜  
朱生之蕃父刺史公名衣以星象碑帖見贈  
二十五晴陸敬承來遂同訪徐茂吳於承恩寺  
餽于瓦官觀厲招慶畫羅漢形容奇古山神在  
後護法神拱立于前宴坐柳間柳根幹枝葉俱  
非宋人所及歙人汪生所施移尊自隨登雨花  
臺小酌于禪理菴菴在臺仄竹叢中傍有中孚  
井青蓮滿中有姪中孚者卽其人也再至臺上  
觀落日山煙盡暮而返又訂明白靈谷之約

二十六晴早出朝陽門從大道而東過孝陵大  
門行岡嶺間稍東役夫指松林內此爲松林領  
內卽齊武帝宴群王九日臺廢趾猶存又東爲  
觀音寺敬承待于彼殿有四臂觀音像像倚石  
屏方廣二仞厚數尺石甚瑩潤永樂初自高橋  
門耆闍寺移此不知何術致之像前石香爐花  
瓶及石座俱擬數百年舊物雕琢工巧非近世  
所有又數里始達靈谷入門行松逕中三里始  
至大殿前臨萬工池已涸又前爲堤堤上大松

快雪堂集 卷之五十二  
數十株更奇古蒼翠大廳七間俱博覽所就後  
殿有吳道子畫寶誌像趙松雪贊當是元碑碑  
陰觀音像亦道子畫後殿之北爲琵琶階殿址  
猶存而殿已廢右爲寶誌塔五來余與敬承同  
陟其顛審孝陵來龍甚確左尋徑至入功德水  
處殊不足觀飯于方丈茂吳始至晚步歷松徑  
至門升輿而歸

二十九晴答拜徐九先生留飯誠意伯之弟劉  
君相陪劉識袁了凡齋戒談玄其言亶亶九君  
先魏國之叔有山園亭臺之樂頗稱好事蕪湖  
張生金礪來驥兒陪

快雪堂日記卷之五十二

快雪堂日記卷之五十三

秀水馮夢禎開之著

乙未

正月初七雨鍾少石來鍾西星來黃貞甫吳伯霖來貞甫欲得余排山塢棄地葬親余再三言其不可不聽約償余金鍾少石貞甫伯霖同飯是日病體難支下午勉陪鍾西星蔣生華國來鵝兒相陪體中發熱

初八天明熱愈汗出小便甚赤雨東園靜攝淫

快雪堂集 卷之五十三  
雨三日不絕點病人尤不堪遣書盛叔永約月中或春仲相會兼示奏草支華平書來薄暮大雪徹明

十一晴霽薄暮復有雲氣將索筆作張太宰恭懿公傳而丁長孺至延之入坐留飯不果作文袁坤儀書來

十二同程惟馨俞唐卿兩兒西溪看梅遇雨憇佛慧方丈晤沈材叔侍御兩郎相上人強欲作胡餅主人赤貧而意甚盛比至西溪雨甚不能出門隱於白雲流水禪房晚索雨具步至新得何氏梅園歸途勘明九沙正結夜汲溪水煮茶大善虎跑之次夜不聞雨滴

十五陰鎔雪作張恭懿傳長溪沈甥鳳祥至小字從龍朱長午陪

二十尚雪園中積素皎然大是佳觀撤燈張沈石田學吳仲珪山水

二十三雨不絕下午住點且有霽色已雲復合未卜明日何如無事弄書帙甚快戴升之來升

之今歲館於沈材叔侍御家升之九江之遊君  
實御之頗善又得侍達觀師於廬山達觀師病  
疴百日賴繆仲淳醫藥升之晤仲淳四五日今  
不知所如矣

二十四陰晴下午間有微雨作示兩兒訓語

二十五乍雪乍雨連日春寒有如嚴冬

二十六早風急飛雪俄四望皎然寒切肌骨茗  
溪金生夢奎來謁辭以他日李玄白來留東園  
書室談叙至夜而別

二十七早晴雲氣未淨俄復合昨雪未消且寒  
甚天氣終可疑耳早得曾直卿少宰書并詩草  
二十帙遣禮部役迎陸敬承過此附敬承書午  
後姜子幹來薄暮得周申甫湛如親家京師手  
書又得楊公亮書

二月初一大雪同程惟馨陸時仲嚴蓋夫驥兒  
湖上賞雪錢唐門登舟沿新堤斷橋孤山至三  
橋龍王堂小憇回舟二橋進裏湖岳墳登岸禮  
忠武像而出遇方次卿朱伯潤自天竺回遂同

舟進西泠出斷橋而返雪山濃郁竹樹奇麗真  
圖畫所不能盡此遊可謂絕勝矣余衣緋童稚  
俱屬目焉今日爲慈祖東溪府君生忌晚始設  
祭

初二鎔雪間飛雪作雪中楊柳及湖中觀雪二  
詩

初五鎔雪天氣稍暖有晴色同沈觀頤中丞淨  
慈訪蓮池老人余先至晤虞長孺兄弟旣去而  
中丞公至同聽戒公發揮楞嚴法華大旨受齋  
而別又陪中丞訪虞長孺隱居兄弟俱出各買  
小舟自湖中歸望諸峯積雪映帶霽色頗爲悅  
暢作過虞長孺隱居兼呈僧孺五言律一首夜  
見星斗粲然

初七晴陰相半鎔雪未盡同方次卿諸君高深  
甫齋中閱諸古玩惟郭恕先臨王右丞網川圖  
馬和之魯頌商頌二卷最佳初到登高閣眺羣  
山積雪遂見此物尤可快也後閱諸帖有泉州  
舊本閣帖最佳深甫以爲閣本非也諸窰器亦



多有佳者留飲至昏黑而別楊中麓相陪竟日  
驥兒從夜酌姚生宗宸將以明日別

初九雨復雪雜雨至暮止次卿等不果行完馮  
豐陽志銘作初七日詣高深甫登閣望積雪兼  
閱輞川圖魯頌商頌圖選體詩一章盛叔永來  
齋中數酌以追沈中丞于餘杭挈次卿去約明  
晚至

初十復雨遂大雪將午止書賈夏四來餉福橘  
四十枚薄暮叔永次卿返自餘杭竟不及追沈  
中丞晤王撫臺而已夜同叔永齋中雅談及神  
仙事言龍沙之讖應在十六七年此八百人者  
余得列焉而鄧先生爲首坤儀次之右武和甫  
俱與數四之一俱士大夫而呂祖曇陽李長源  
主選仙才去華爲教主事亦奇矣又靡靡談及  
他緣遂至夜半

十一陰黃昏微雨盛叔永方次卿飯而別方士  
鄭老同飯客去復爲余細談養生之事授余三  
一經虞長孺和余詩至十首僧孺七言二首戴

升之自佛慧寄所作舉業三篇來翩翩才情已  
還舊觀可喜驥兒臥病三日今日始起升之又  
致達觀師渡江等偈自是道人本色語升之見  
道人登廬山文故宜勝耳

十二花朝新晴喜慰信奴自婁東回得荆翁師  
辰玉曹周翰朱支中王逸季周叔宗報叔宗寄  
余詩一章及余出處甚得余無心玄應之意婁  
東師面諭信奴屬余勿上再疏書中與辰玉書  
俱及之角孫二三日病數日頗少驩愉昨始  
如常時來書齋娛嘻足慰膝前夜月甚佳於是  
不見月兩月矣

十三晴月更佳此日天色和旭始覺有生入之  
樂賀知忍遣問紙尾詢李龍眠晉公子出亡圖  
得繆仲淳書趣余早北并以楊忠愍傳相托示  
余王方麓先生所爲忠愍傳詳于弇州知以初  
六日別知忍此時又向天涯矣沈生者余故人  
以米襄陽墨跡一卷見示俱手牘得自姚伯道  
者又祝書文畫俱佳物茗溪二姚生以文求閱

快雪堂集 卷之五十三 六  
劉聖鄰繼至談講竟日  
十四晴晨霧下午微陰夜月昏翳海鹽沈氏女  
同壻歸寧曹林禪人自吳中見訪偕信菴關主  
通梵書余出皮經貝葉相示與客同披王維江  
山雪霽卷南禮部使者還自蘭溪得陸敬承書  
荅曾直卿七言律四首并書

十五早陰間洒微雨午後開晴夜月大佳往湖  
南曹林信菴已至晤王兩高猷吉坐中有二虞  
空一戒山午飯後同諸君憇法華臺露若沙彌

出陪同登慧日峰

十六晴午前微有雲氣夜月甚佳成再過湖南  
詩一篇曹林來

二十一晴暖遂去綿衣園中玉蘭與梅花並艷  
新柳漸肥平湖兩馮生伯禮伯禪來爲其父乞  
墓誌銘曹林信菴別去周叔宗來寓齋中午後  
同觀王維雪霽卷出文石與諸客共玩是日天  
氣絕佳春物增盛遊興勃勃矣

二十三晴暖微有烟霧旣午同叔宗張異度等

快雪堂集 卷之五十三  
汎湖觀六橋桃花自新堤歸柳色濃淡最爲悅  
目

二十四晴暖僅勝單衣午後叔宗挈驥兒出遊  
湖上余成送王中丞歸魯序園中桃李爛熳梅  
枝空矣

二十五晴暖同叔宗張異度諸君泛湖歷龍井  
法相法相僧衲雲延坐竹軒甚幽勝新釀尤佳  
沽一尊至蘇堤坐飲桃花下步至一橋登小舟  
沿孤山湖飲泛盡日此日桃花大放柳色愈酣  
景物妍肆遊情曼衍驩不可言兩兒程惟馨諸  
君至龍井而分

二十六平旦雨殷雷甚久中園卉木得雨氣象  
酣適與叔宗宴坐南屠蘇喜氣自倍門生顧侍  
御來名某與訂二十八日湖中之約成二十三  
二十五二日詩晚晴

二十七晴宋宇菴來旣午同諸君再詣高深甫  
齋中索觀諸玩再見輞川三頌二圖及開皇榻  
本蘭亭畫冊百紙

二十九晴范爾正來周長卿來乞文贈衛水部  
二姚生來索文字莊靜甫索文餉定盤一枚午  
後同長卿叔宗出湖上聽童子清謳遇雨於三  
橋露臺雨行里許桃花着雨益滋鮮妍但紅英  
揉亂爲可憐耳因憶昔年賦桃花片佳句與叔  
宗嘆嘅久之歸途訂初一日五雲之約馬心易  
來期明日相訪于湖中八中園茂木樹中  
三十風雨午後開晴祀先蔡氏子乞余名名之  
曰鸞族是日送回同程惟馨訪馬心易先晤戒  
山了空於法華臺心易至談叙良久同觀露若  
詩僧獻伊蒲供再步法華臺觀岩石是孫太初  
舊隱築一室大是勝處別心易同惟馨露若師  
弟自南一橋散步桃花堤遇邵虎菴虞僧孺戒  
山空一二上人復陪行至三橋而別余至六橋  
始得舟泛西泠斷橋進錢唐門是日東北風頗  
急湖水生波桃花雖飛片尚濃郁可賞耳戒山  
憶余桃花片詩一首因共歌之大是悽惋落日  
在水頗極淡蕩之趣

三月初一早日色甚赤少選雲氣漸合且作寒  
叔宗有怯出意倍挈綿衣而行出湧金道淨慈  
詣新塋致敬由山後達虎跑周長卿已待於珍  
珠寺矣卽九山乃往從之路半而遇將至珍珠  
徑甚幽舊行速不及探循澗而行石壁甚奇約  
里許達大路午飯五雲頂余不登五雲數年矣  
因同叔宗程惟馨審燕屯來脉甚確由山後右  
折仗策扶攜而下約三里許夷險相半再從九  
溪十八澗而還憇石屋藉草定香橋進數酌桃

色映柳濃淡開落相間聽清謳一曲遂行徑六  
橋水次遇鷁兒載客至周長卿程惟馨俱從之  
余與叔宗泛一葉沿孤山堤而歸遇驥兒於堤  
畔一人守一舟從二奴先歸

初五陰早雨一陣陰寒不果遊潘生名卿來種  
竹是盛上人山中所移  
初七早起觀竹間曉色甚樂粥後同程惟馨張  
于燕歷荆山形勢明確爲此一方最勝處小憇  
陳中丞墓祠小閣再歷崇家墩前地盡處一突

面荆山亦佳飯於荆山橋傍神祠前亭有魚鮮  
之供返永興戴升之已至早遣人迎之并取泰  
安泉烹之入口爽美遠出白雲澗之上吸數壺  
石人塢訪于燕讀書處叔宗升之同行塢甚深  
邃竹樹蒨茂叔宗臥小樓良久先後還集於福  
清禪院主僧桂峰上人乞余題堂額時集衆誦  
華嚴余題曰雜華堂出筍供還至九砂竹間瞻  
眺久之蓋余所欲規爲莊園者惟馨以爲水木  
蘆鞭作葬地尤宜返永興月已娟娟竹樹間矣  
于燕別歸書室月下談笑甚適

初八晴早爲麟上人作萬人緣疏午發西溪西  
北行二十七里至餘杭一路曲水叢木溪山映  
帶頗宜栖遁途半登蕭王臺其中一隴氣脉藏  
聚仙人鼓琴形堪爲葬地將至三里許泊舟綠  
樹下中火村民結椀爲籬晚花尚吐娟娟可愛  
晚宿李忠正王廟小樓東直安樂塢廟祠宋相  
李綱蓋嘗提舉洞霄宮云

初九晴熱如初夏早發餘杭晤縣令吳君自脩

上計初至出北郭十里過新嶺又里許過尚母  
橋左挾官谷山溪水明靚可愛又十餘里中火  
吳山寺寺徑甚紆曲又數里至雙溪途半有山  
左右夾從完固奔溪而止意其可當佳卜雙溪  
居民千餘家山溪間一大聚落過此見雲氣中  
山翠隱隱卽徑山也二里許爲化城寺舊址議  
欲倡緣建精舍爲刻經藏經之所非千金不能  
舉事姑待之行兩山間六七里過直嶺凡五六  
盤至徑山幻居體玄兩上座迎至三門外先至

望江亭舊址見南際諸山如屏卽武林諸山其  
外雲霧中練光隱隱錢塘江也故以望江爲名  
上殿禮佛次諸祖次伽藍由殿左登山不半里  
爲喝石菴菴新創體玄所居石斷爲三俱胝道  
人呪力所致菴以此名門直之修竹照映坐廣  
庭良久主人進粥乘月返登文殊臺大杉圍徑  
丈傍建精舍幻居所棲出門數武卽大慧塔亭  
亭右古銀杏甚大圍徑丈宿某上人樓居余丁  
亥初夏舊榻在焉早從吳令借得小錄吾郡中



式賀伯闇外沈道原陸錫恩褚繼良四人南雍  
諸生朱之蕃一人相知周元美道行二人余下  
初十晴暖止堪單衣早飯禮佛施佛像大士像  
各一幀于刻經場喝石菴供養拈香畢自殿左  
覓徑登鵬搏峰峰凌霄而來下生小峰所結卽  
夕照元叟端公塔院業新屬刻經場蓋從程惟  
馨反復研審而後確夕照外圓池端公所濬以  
放生者向瀦新開壁水可鏡徘徊久之至文殊  
臺靜室解衣臥良久午飯後與叔宗分處余占

靜室叔宗占樓居余成楞嚴纂註序葉司馬平  
西輿頌序又成初九日朝發餘杭夕宿雙徑詩  
一首歸樓居浴主僧羅列相欵叔宗詩二首俱  
成晚飯後復步文殊臺憇月良久歸寢早聞之  
體玄前爲道流挈登聞 嚴旨逮治僧德清者  
卽愍山也蓋以道宮久毀因蓋佛屋遂至此可  
嘆

十一晴熱早謁大慧塔遂下山中火吳山寺初  
體玄相從將至雙溪墜驢竟不果來初從溪邊

見男婦乘筏與叔宗議欲效其製置一二枚於  
西湖中朱欄翠幙可方可單亦佳事也取道不  
瀨出瓶窑則官舫及小舠從俞唐卿相待一日  
矣性具菴住僧妙峰弟子相邀至菴中設浴出  
伊蒲供夜月甚佳

十二晴熱微有雲氣日中微雨一陣唐卿陪髯  
公入山有所物色待之無淨寺綠樹下溪山映  
帶間弄筆墨數日來最爲自適成二詩晚坐月  
鷓首而程俞二君至山中竟無所得夜發舟至

奉口

十三有雲氣而不藏日暄氣更深午前虛雷雨  
一陣漸止夜雷雨徹明是日舟至橫涇易輕舟  
進十里沿溪曲折綠桑遍地荒村鷄犬相接登  
山尋覓似少融結當在駱山上矣此日探山凡  
三約步行三十里最後與叔宗偕晚至德清泊  
舟毛公橋內程俞別宿懷晉菴

十四雨夾微雨尋開尋雨早至懷晉菴入城寓  
蔡氏宅別駕查君兆胤已先至報謁查別駕丞

陸集尉李森然來謁俱維揚人蔡氏留飯此中  
方山發祖一支結縣一支東北行爲官莊又折  
爲三支中短而左右長廻合十餘里中必有物  
又一支爲仙洞塢中有蔡氏祖地查別駕卜明  
日相欵其意甚誠不得已許之回舟毛公橋夜  
雨徹明五更聞雷聲隱隱

十五陰雨微雷午後稍止查別駕招飲乾元山  
顛上有佛祠舊名宣化院陳令改爲高士菴傳  
有織簾先生者曾隱此山山於羣山獨高晴霽  
可徹見百里內山川中飲大雷雨作咫尺莫辨  
將昏還舟程俞仍宿懷晉泊舟近西關

十六雨發餘不溪過菁山弔鄉先生祭酒范公  
之喪三公子同表兄某文學出陪延登山樓頗  
宜眺矚離菁山不十里泊舟是日同惟馨審定  
菁山正脉過水結東林矣途中遇淨源上人宿  
舟中得幻余上人書雨達明

十七早雨午後晴夕陽映竹樹甚豁人意午前  
至吳興泊舟夾山漾訪錢緯西名應奎不在家

其子出迎昔年童稚今冠生子矣與叔宗婆娑  
書齋中竹樹森鬱曲房閒靚頗有宴坐之適叔  
宗同賦空館盈清思詩成余補餘不溪聽夜雨  
詩一首夜星斗爛然易吳興船

十八晴順風薄暮至和平鎮夕照散步原墅

十九披霧登石城山叔宗母薛葬處山中竹木

繁茂大異往歲產茶品在天池龍井之上泉品

堯峰下西溪上阻雨不能登覽棲止禪室同賦

晨登石城山憇霧精廬詩春晚賦得眠鬟壓落

花共二首余獨賦雜詩一首補初到徑山詩一  
首

二十早霧雨午前雨止遂由山右趙村登小舟

至潘店過官舫城山主僧福菴延欸意甚篤密

臨行贈茶一器許惠之詩篇夜至長興舟泊城

外丁長孺遣人相聞薄暮雨晚粥已丁長孺來

談叙良久

二十一早雨旋晴姚氏兄弟丁長孺俱來入城

訪姚氏三兄弟長伯道次仲文次叔度仲支子

政君康侯余弟子登伯道齋閣南西北三面見  
山西面尤勝訪丁長孺及其叔敬止拜令劉君  
一臨先集長孺齋中晤陸生祐先吳之西山人  
貧士歸舟劉令來二博士來其劉姓名暨者同  
年劉慎齋之族兄諸丞尉來丁生某來長孺治  
酒相款下午會伯道齋閣落照甚佳與叔宗同  
賦餘霞散成綺未作訪同年孫君一俊以武進  
令緣事歸齋閣亦有此君晚赴縣席半夜歸舟  
二十二晴早易舟泛菴畫溪西上十里叔度長  
孺俱移榼作主晚歸仲文作主有弋陽梨園今  
日泛溪兩岸綠樹映蔽又有侑觴者食酒頗多  
程惟馨狎歌者不歸舟

二十三晴早發止十里外待丁長孺乃叔敬止  
之約姚伯道叔度來送康侯政君自武林歸過  
舟同飯飯後長孺與叔敬止至治酒舟中相款  
至呂山移酒綠蔭紆迴久之而別與叔宗擬題  
賦詩初更達吳興郡郭無星

二十四早晴午後微雷風微雨早移舟峴首憇

滴翠軒昔年屢從子晉婆娑于此悽想久之烏  
程許令某來節推謝君肇淞來閩人李君實同  
門頗有文采戴守來談叙久之別去約午後開  
筵歸舟送程惟馨時有睦州之行附書陸敬承  
盧思仁思仁有一縠一扇遣小舫送至武林便  
屬書儀送盛叔永之閩又附次卿數字沈太史  
銘纘來赴郡公席于逸老堂戴君誠篤細亮頗  
宜此邦而善病瘠甚薄暮雨至登舟錢緯西朱  
伯潤淨源上人俱在舟錢舊字卽余名今爲易

此錢先別次別淨源伯潤宿舟中夜大風雨  
二十五風間雨早朱伯潤行舟中無事戲成聯  
句嘲髯君幾欲絕倒下午至馬要弔沈司空敬  
宇父喪二沈灌演母喪事畢徘徊慈恩寺夜入  
舟唐卿弄琴余與叔宗探書甚適

二十六微雨晚晴早至璉溪訪鹿門先生已先  
從談玄人往上陌矣稚修出迎晤梅季豹黃貞  
甫吳用修飯後宅東散步田野至石橋而止宿  
齋中

二十七晴止稚修齋中薄晚主人開宴貞甫以居喪不預宴宴罷曲宴書室二鼓登舟

二十八晴未至南潯徐季恒錢緯西來叔宗以輕舟先發余先從小舟訪朱平涵吉士次弔董宗伯之喪錢緯西溫允文朱平涵相陪始見會試錄又聞廷試大魁乃朱生之蕃季恒附舟過震澤三賢祠古柏盤鬱蓋千年物舟行速不得徘徊其下送目而已行四十餘里夜泊舟平望叔宗遇親知尚不前同陸纂甫過舟中纂甫啜茶數壺先別叔宗留奇談鬱起不覺遂過夜半並舟而宿

二十九陰晴日在雲表是日立夏午前過吳江日晡至吳泊舟胥江之清風亭方次卿尚未行得此良晤甚出意表次卿季恒俱宿舟中

四月初一晴微陰夜星斗爛然移裝遊船遣吳興船午前次卿入城余偕季恒輕舟詣虎丘遇沈伯宏于途遂同行既至從二山門登山先憩竹亭亭圍新綠鳥聲悅耳主僧信吾出本山茶

爲供遂登山憇禪堂前小閣下臨石塲綺莊甚多主禪堂僧天際以信施不敷遁之白下其徒性空接管于賀券施已缺二年將以余書索之次至千頃雲遊人頗雜一望陽山而返次歷五臺致爽閣閣亦面陽山下有薔薇木香諸卉紫白悅目甚念家園次過千佛閣政臨生公臺遂下山歷雲水閣邂逅曹子念吳沙村曹自喻邦相倅杭時晤業白菴席上今十五六年矣吳亦舊識己卯告病而南樟亭太公相善曾市其酒

二君同過竹亭噉餅竹亭主僧餉本山茶二兩與曹吳別登憇山右僧寮所臨徹見大是佳處陸時仲徐生淳孝來薄暮登小舟而返市茉莉二本舟泊長船灣季恒別于閶門約明日再出夜初噉江魚

初二晴早泊長船灣沈伯宏同徐生元節陸時仲來伯宏餉櫻桃江魚徐陸先別移舟石湖緩步治平寺先至五賢祠新竹數百竿大有佳色次歷雲袖禪房昔同叔宗過今三四年矣宴坐



久之晤沈祖量下午歸舟買放螺蛸二龜信奴  
城中至知婁東相公出弔南潯已過當先海虞  
矣過橫塘叔宗船至余方閱白下牘及家信不  
減數十函嘗新蚿略不知味俗緣之不可染如  
此舟還早泊處次卿季恒來連日一無佳事可  
嘆

初三晴早移舟半塘寺後晚起捉髮見長松茂  
林衷抱怡悅與叔宗宴坐未久項君卿至同飯  
松下而別移舟原明菴次卿季恒伯宏三君來  
以覓舟頗饑索飯甚急朱支中讀書菴中入舟  
相迎朱以去年九月別於南翰公署登岸漶淩  
松岡大是幽勝昔年陪沈君典太史娛嬉處壁  
間尚懸太史手蹟展讀增愴支中治餅相留又  
張老者持畫卷五六見示無一佳者叔宗弄筆  
研余先去待之虎丘泊舟二山門登岸卽晤陸  
纂父久之叔宗至同登石塲邂逅范爾孚彭野  
夫野夫曾以卷乞題尚不及償與叔宗纂父叔  
宗伯宏季恒唐卿同憇千頃雲看落照遷憇曹

氏曲閣新月娟娟挂木末季憚目不能見亦奇  
事徘徊閣中索酒數酌竹亭主僧邀往澡浴浴  
畢登舟夜話沈徐宿舟中季恒息雷頗攪清寂  
叔宗纂父二更盡別去

初四晴早發虎丘乘順風薄暮抵海虞泊舟觀  
音菴水次是日頗暇豫啜蚡香味雙絕數日中  
所無恨不與叔宗共之補雪溪詩二首

初六陰晴早發虞山行七十五里抵暮至崑山  
泊舟大西門外孫子桑與弟子騫名槎者先見

送日中治酒舟中相款夜過余舟啜茶而別遣  
偵荆翁相公消息以今日午後過此此日成憶  
家園薔薇瓶中白芍藥二詩

初八陰雨黎明乘潮辰刻至崑山買小車入城  
奠顧實甫實甫以癸巳二月物故其年秋葬祖  
塋墓有宿草矣兩子同德同應憶巳丑訪實甫  
時新置宅延余皆山樓同應年六歲長筭餘潤  
兒實甫鍾情持甚今十二齡矣撫此不免涕泗  
實甫仲弟芾偕二子置酒山亭相款飯後步憩

皆山樓惟有感慨實甫身後有宿逋計無復之  
將棄新居從此不皆得爲山樓客矣訪徐太史  
端銘留叙抵暮歸舟顧氏叔侄來謝徐端銘來  
十八晴微寒月色模糊風午後至當湖候陸臺  
翁弔其夫人陶喪留飯臺翁精神清白語次必  
及人才歷問南京諸老燈下談叙良久而別宿  
舟中布衣瓌生餉蘇長公外紀前婁東道中見  
於孫子桑舟中恨其削去烏臺詩案罰飲墨汁  
十斛未盡其辜夜啜茗甚適陸生基仁突至不

冠見之

二十九晴無事試開園峴甚快許然明共之關  
使李君來掃除書室分茉莉

五月初七微雨下午過法相訪陸敬承飯于僧  
納雲竹房東房僧懷初同作主午前定香橋登  
舟歷龍王堂水閣湖心亭放舟中流遷汎移日  
二僧俱在坐敬承飲興頗豪如勝白下晚別於  
定香橋腹微痛

初十微雨山中訪陸敬承至湧金偵知己往龍

井從之坐片雲亭竟日驥兒從坐客有姜子幹  
泉聲淙淙入耳頗洗俗腸早二縣令君見訪辭  
以入山

二十九晴有忌日之祭荅許裕甫書二子驥文  
稍進收拾手卷等物受梅蒸氣者是月以得食  
楊梅爲快

六月初七雨早池水沒至南屠蘇今歲未有  
者薦杜揮使詩于李總戎秘菴上人以雪翁書  
見屬者南翰舊吏陳善言以考選乞蔡太宰曾

少宰直卿二書直卿將入賀以內人坐喜臨月  
緩行陳子卿孝廉來驥鷓出陪馮生伯禋來孫  
上池來鄭岐東來是日客多晚始得休附季少  
司成書於陳吏是日午後雨止夜半雨徹明  
十一晴至池齋始却雨具具飯邀年侄郭生欽  
華胡休仲許然明陪是日辰時驥兒房婢生一  
子

二十七晴熱李生登雲設席欵余湖中金小竹  
陪金說胡大司馬平倭時事縷縷可聽二子從

午憇湖南淨慈晤戒山鄭元夫露若諸緇素楚  
僧蘊璞以十四日放生說法致憾戒山遂遁入  
城

七月初一陰晴間雨雷夜涼遣叔宗使回連日  
噉芡甚暢鵝兒病瘡小愈徐盛二客在齋中談  
說舊事靡靡可聽

初二早晴午後大雷雨如注池水頃刻充溢盛  
草汀挈榼往普福太山攢室酬酒徐有茗溪之  
行二人前途未免遇雨耳

初三晴熱午後有雷許然明來啜茶數壺擇初  
五日後樓立木此日搭架前廊街簷成答吳生  
如孝書

初四晴熱下午有雷連日建蘭數莖花甚芳烈  
弔鄉先生陳公之喪名希文官至僉憲其屋頗  
潤而兩郎君欲以三千金求售亦可傷矣同宋  
司馬陳孟文江子振錢季梁謁醮使王君立賢  
午後盛草汀辭歸下午拜客晤張于燕得鮮蓮  
五十歸合家共噉夜半破腹

初五晴下午起陣殷雷不已至初更急雨疾雷  
是日辰時立木酉時上梁醮使王君來面辭項  
生臯謨來

初六晴午後雷雨一陣甚烈而不掩日從宋司  
馬五輩餞醮者午前畢事

初九晴熱夜悶熱更甚金孝廉應鳳來安吉州  
博盛君治徵見訪下午報謁二君金偶出盛行  
矣連日杭民盛傳有妖夜入人家壓男婦出血  
吮之有昏迷至死者婦女驚怖甚夜逐妖叫呼

金鼓之聲不絕起自富春初四五遂至城中

十一晴日中起陣先風雷大作涼雨繼之得姚  
叔祥書見屬范司成諸孤夜涼

十三晴下午風雨一陣晚涼葡萄亭斃完晚天  
甚宜徜徉得董玄宰書借王維卷閱亦高興矣  
沈認卿遣子鍾見省夜觀西北明霞如霧中烟  
脂倏忽變幻此日祭先

十四晴晚微陰夜微雨五更雨滴有聲段廣德  
猷顯遣使問至并索徽寧道張蓮濱書辰州楊

別駕瀧去歲赴任乞同年湖北道陳還冲書此  
日得陳報餉辰砂二斤楊亦致謝門生胡靈昭  
以今春計事去官六月歸姚江丁母憂遣禮并  
土物乞墓志銘待命于數日之內向來門庭水  
冷一旦喧雜世事盈虛亦偶然耳

十六晴微陰夜漸涼儼然秋色矣內人請僧誦  
經薦外家先亡隨俗設中元祭于廳事

二十一陰雨間晴復雨欸臧晉叔不相見五年  
矣季修陪汪生宗姬來餉文卷一事宗文之兄  
二十三晴天氣清涼秋色深矣任孝廉納贄稱  
弟子于燕先躬索王陳二書留飯

二十九晴夜半聞雨聲甚厲是日始築牆脚樓  
工將畢從梯登望西南二面青山歷歷又議起  
西軒三層或可望湖色及長堤六橋矣

八月初一早大雨如注午前止夜陰微雨沈公  
子虎臣幼壻超宗兄弟至云昨午至塘西大雨  
如注此中微陰而雷氣候數十里不同如此姚  
江孫孝廉如汪來汪生持田子秬先生所緝風

雅總逸乞序蓋先生之意出先生手校有跋語  
令人慨嘆今安得有如此人是日晚欵二沈馬  
康二君侄婿姚生俱在坐再得茅孝若吳用修  
二書

初二早微雨終日不歇連綿晝夜赴靈隱齋爲  
易菴新受請故同邵虎菴虞長孺兄弟宋化卿  
兄弟謝生介山諸緇白兩兒陪二沈生遊湖得  
徐季恒書

初八晴下午風湖月甚佳同陳孟文欵馬心易

初十初孟文別作主未至拉程惟馨同叙歷岳  
龍王堂登舟中席且至藕花居孟文從小舟  
來談叙驩甚賓主俱沾醉登岸步至萬峰房歷  
法華臺數酌登舟別心易是夜心易宿東退居  
余與孟文惟馨至湧金門別此日噉庖人羨致  
腹痛張子山在齋中是日閉舊街從新街行  
初十晴得彭欵之書遣吳興謝節推書易菴法  
主具齋相邀遂禮明教嵩五事塏塏亭已圯披  
荆莽行里許方達其下有窩欲規建懺室又下



數十步有石鼓禪師塔相望先年有規爲墓者  
僧移明教塋上方石鎮之今上未改事畢還靈  
隱水靜室受齋同二虞邵虎菴鄭生介山諸緇  
白文昌祠秀公邀入茶索閱理宗御容及家  
慶圖俱近代贗筆往來俱從湖晚景甚佳

十二晴下午多雲氣無月早行過塘棲始起以  
舟隘易之而行夜宿染店灣距硤石三十六里  
十八早起忽晴臥內聞轉南太司成之命出錢  
塘門拜包太公遇之昭慶寺東同步至寺右一

小樓洶瀾而入望湖山甚佳談坐良久而別拜  
屠冲陽寓湖船將東返矣入昭慶寺拜董伯念  
不遇赴俞中書之召江干看潮遂往龍井入城  
邂逅崔君世達二卓生爲父光祿君求傳夜月  
佳甚惜無佳客共賞耳  
二十八晴下午驟雨數陣朱汝虞來留飯爲求  
方濠年伯誌銘劉聖鄰來是日戒苕溪武塘之  
行下午出門先詣府縣報謝復出錢塘門詣昭  
慶訪汝虞尚未還寓途中訪黃貞甫底暮到舟

俞唐卿同行未幾寓金中請黃真甫刻蘇陸氏  
二十九晴過德清十八里而宿距埭溪五六里  
議以明旦遊顯親寺  
九月初一晴早粥卽過小船行十里登岸步至  
橋司觀音堂僧省菴所居主人偶出托其徒覓  
筍輿約行六七里至顯親乃山之一曲雖無結  
聚而僧居甚幽入徑松兩行屬之佛宇約千餘  
株俱別傳所栽又栽桑開田勞績頗著不可以  
人廢也今爲銘寄幻所居寫經楞嚴不及晤其  
徒造飯爲供周行山界而出過大舟日已西矣  
薄暮宿村落距菁山四五里相對有石峻層數  
十塊惜不在園池間耳

初二晴早起烟景甚佳午前到錢緯西莊晤緯  
西季恒少憇書室同遊水東小石山山有松數  
百章石林立可以憇坐陸北川中丞墓其下而  
非牛眠相之穴當在上爲汪氏業錢湛如移舟  
相就相對盡數酌不見三年矣湛如失長子方  
四歲掌珠頓割可念也夜宿緯西書室

初三晴早微陰漸開遣信奴往吳閫茅孝若吳  
用修陸拙之三人來舟中談甚久領主人飯而  
行舟泊峴山西二里許蘆洲中嚴蓋夫持趙開  
府答書自吳中至武林追見于此附項君卿舟  
回別錢緯西錢湛如來相叙底暮登峴山而別  
舟泊南郭外與漁舟爲鄰

初九晴移舟尹山與次卿唐卿登高山絕小而  
數十里內山川洞盡山頂有玄帝祠下爲寺寺  
卽國初隆菩薩道場連日斷惠泉于季華宅得

一罈烹試甚甦渴腸日中次卿往吳中因遣奴  
子汲惠泉十甕東房僧來送茶扁荳爲供延入  
寺隨喜過齋僧堂前二層小房管登之所構後  
一層稍高大方丈也繞徑有高榆古栢僧出其  
所藏塔銘及名人詩翰見示塔銘姚少師撰文  
章軟弱似國初儒宗語殊無文字般若氣內有  
吾郡謝文昌詩謝官御史向亦不耳其人最後  
弁山翁詩跋僧云舊人詩甚多惜爲裝潢者節  
去可嘆師名永隆城中施氏子以洪武二十五

年化材木造殿舟漂幾入海師祝應口風回有  
木商某者驚異獨捨材造大殿師遂入京時  
高皇怒行童求度者不通經盡遣戍凡三千人  
師奏願乞焚身赦三千人罪得旨以某月二  
十五日雨花臺焚身舍利無數師方就焚取辦  
香書風調雨順四字令內使傳遺至尊曰以此  
祈雨有驗時方大旱如其言雨隨注高皇曰  
此隆公雨製落魄僧七言詩今刻石在寺作祭  
陸仰山年伯文下午石一男庭璋以乞書物色

至此方徬徨松陵適遇信奴與俱至事之巧湊  
如此夜鷓首月影汎水中明瑩不定大是佳觀  
初十晴暖有釀風意夜月甚佳石廷璋早行作  
衛水部德政碑記宿諾半年乞文商六已喪二  
矣又作鄭元夫舉業序旣午僧來送茶遂沿水  
東行窮尹山所止前一丘稍巨乃正脉也葬者  
俱誤前有二珠印穴此中人相傳爲龍戲珠形  
良是周遭墩垵無數前有巨湖橫亘如帶吉土  
無疑歸舟解衣傷風喉微啞薄暮登尹山望前

山結甚確初更鷓首觀月

十一早晴午間風作稍昏無月俞唐卿從寧信  
二奴往吳閭作孫勅使兩勅江南圖序吳伯霖  
母孫碩人墓志銘今日先慈忌日茹素噉粥且  
以清喉肺爲却疾計五更夢沈太史茂仁謁余  
余知其已死故昵之沈却走曰子陽氣盛余不  
敢近也因命坐余坐上與沈隔二三丈因問子  
未死前余婦夢子遷官儀衛甚盛未幾物故子  
在冥今爲何官荅曰官則有之但不管一事耳  
又問陸汾陽今相親不荅曰亦相親余呼沈必  
曰親家政欲訪其家門及二子功名而甦姑記  
之

十二陰午間細雨俄止作卓潑甫傳包孝子傳  
吳無競制義草序小僧六虛送茶扁豈并邀浴  
因留一卷乞詩六虛之師祖號紹庭齋僧堂主  
號東暉舟泊尹山凡四日旣豐暇豫又畢文責  
此出山後所希有者夜西北風起舟末發木動  
地吼擊至明

十五晴早至拙園泊舟九曲港寫荅南京諸公  
書附監役去訪周彥雲談叙良久至四弟舍噉  
蟹初更歸舟過沈明卿奴子月中吹簫頗有奇  
興主人酒不佳小敗意耳  
二十四晴午後到塘棲送還卓激甫傳訪外氏  
族人卓去病兄弟留叙嘗新蜜橘

十月初六晴早噉黃爵甚佳程惟馨忽至甚喜  
入山相視金井忽于前山望見一地甚奇業以  
許張于燕會內人來往溪口迎之又未到遂踪

跡此物登山甚險滑至巔窮穴情未得要領却  
望嫩乳甚佳而返程惟馨開山太老露石仍移  
至初定楊梅樹邊乃得吉土惟馨同于燕密視  
前地三台脉從鄭公尖而下起龍山次穴山懸  
乳次虎山堂局周圍外洋森秀蓋希有之物爲  
石人塢主人惜已許于燕物各有主人寧可干  
耶連日甚擾鄭元夫夜小憇瑞庭禪房鵝兒來  
二十五晴舟至虎丘而覺曉登千頃雲禪堂訪  
天際還舟王孟夙吳無競來同飯道冶坊浜至

寒山寺一面寒江曉山二上人而行午後赴徐  
文江席薄暮赴王百谷席于舟中朱支中沈稚  
咸卓去病陪夜赴徐大來席出家樂內人亦赴  
徐夫人席

二十七晴早發日午到無錫汲水三十罈大風  
不得行過王房仲舟小叙二顧移酒舟中迎叙  
將晚而別日者戴雲洲來徐生文任來夜半發  
舟

十一月初二晴平明行中火關上上馬橋更衣  
各役迎諸生迎陳公衡迎至高橋門外簿廳迎  
玄真宮待孟蓮諸君良久而至少司空周公來  
同年周繼元來公宴畢詣神樂觀昏黑賀知認  
來方行而周叔宗至遂留宿是日家眷入衙  
二十九晴進衙門視事閱二十八日課定王之  
禎爲首

十二月初一風晴日色俱黃新南廂黃毅菴已  
至水西門往舟中相迎靜海寺拂塵公宴黃戊  
午生少余十歲尚未有子姬人業坐喜分娩之

期在來歲二月家尚有母夫人二弟荅同年陳  
還冲書門封我中臥以精感有對望公宴黃丸  
初十晴寒進衙門諸生以出示頗清肅張生金  
礪來留談終日邵以庶來寶幢之子癸未歲余  
至內閣看歲貢卷取邵爲首八日禮文王文  
十一晴稍和荅朱平涵書下午衙門治酒南衙  
一鑑亭爲黃毅老温居循故事也合無贊狀請  
十五晴寒祇謁先聖監生點名不到者七人視  
他日爲多壓撥外批西廳責治以儆其後少司  
徒陳公來門生陳公衡來委協管陳君率性堂  
王君查理風火池得張蓮濱段廣德書  
二十九四更後雨日間陰微雨是日供高祖以  
下真校對三國志魏書列傳九卷

快雪堂日記卷之五十三



未嘗談終日亦以歷來寶輪之...

丁亥外惟三國志驟書...

二十七日四更雨日間劍...

王孫查野風火此...

...



